

T-6

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona”, broj: 7/10), na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 4. sjednici, održanoj dana 07.05.2019. godine, d o n o s i

## ZAKLJUČAK

### I.

Prihvata se Mišljenje Ministarstva za poljoprivredu, šumarstvo i vodoprivredu, broj: 05-02-5309-4/19 od 22.04.2019. godine, o Prednacrtu Zakona o lovstvu, predloženog od strane Federalnog ministarstva poljoprivrede, vodoprivrede i šumarstva Sarajevo.

### II.

Zaključak sa Mišljenjem iz tačke I. upućuje se u dalju skupštinsku proceduru.


### III.

Zaključak stupa na snagu danom donošenja.

Broj: 02- *02-727* /19  
Datum, 07.05.2019. godine  
Zenica

#### DOSTAVLJENO:

- 1x Ministarstvo za poljoprivredu, šumarstvo i vodoprivredu,
- 1x Stručna služba Skupštine,
- 1x Federalno ministarstvo, poljoprivrede, vodoprivrede i šumarstva,  
Sarajevo (putem ministarstva),
- 1x a/a.



PREMIJER  
*Mirza Ganić*



Broj: 05-02-5309-4/19  
Zenica, 22.04.2019. godine

Federalno ministarstvo poljoprivrede, vodoprivrede i šumarstva Sarajevo aktom broj: 08-26/7-204-13/17 M.B od 21.03.2019. godine, a u skladu sa izrađenim tekstom Prednacrt Zakona o lovstvu, od Ministarstva za poljoprivredu, šumarstvo i vodoprivredu Zeničko-dobojskog kantona, zatražilo je mišljenje na predmetni Prednacrt Zakona, obzirom da se radi o zajedničkoj nadležnosti federalne i kantonalne vlasti.

Aktom ovog Ministarstva broj: 05-02-5309-1/19 od 08.04.2019. godine, Vladi Zeničko-dobojskog kantona i Skupštini Zeničko-dobojskog kantona dostavljen je akt Federalnog ministarstva poljoprivrede, vodoprivrede i šumarstva Sarajevo broj: 08-26/7-204-13/17 M.B od 21.03.2019. godine, na nadležno postupanje.

Stručna služba Skupštine Zeničko-dobojskog kantona aktom broj: 01-02-5309-2/19 od 12.04.2019. godine od Vlade Zeničko-dobojskog kantona, a u cilju postupanja po navedenom aktu tražila je da se dostavi mišljenje, koje bi Skupština Zeničko-dobojskog kantona imala u vidu prilikom razmatranja Prednacrt Zakona o lovstvu, te na osnovu kojeg bi Skupština mogla utvrditi svoje mišljenje po istom i dostaviti Federalnom ministarstvu poljoprivrede, vodoprivrede i šumarstva.

Vlada Zeničko-dobojskog kantona, Stručna služba Vlade u prilogu akta broj: 02-1-02-5309-3/19 od 18.04.2019. godine, dostavila je ovom Ministarstvu navedeni Prednacrt Zakona o lovstvu, da kao resorno Ministarstvo, u skladu sa odredbama Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 5/11 ), dostavi prijedlog zaključka sa mišljenjem o istom, radi razmatranja na sjednici Vlade Kantona.

S tim u vazii, nakon razmatranja dostavljenog teksta Prednacrt Zakona o lovstvu ovo Ministarstvo daje slijedeće:

## MIŠLJENJE

Ministarstvo za poljoprivredu, šumarstvo i vodoprivredu Zeničko-dobojskog kantona prethodno putem člana radne grupe imenovana Rješenjem Federalnog ministra poljoprivrede, vodoprivrede i šumarstva broj: 08-26/7-204-5/17 M.M od 09.11.2017. godine, za izradu Prednacrt Zakona o lovstvu aktivno je učestvovalo u razmatranju i analizi Prednacrt Zakona o lovstvu i Federalnom ministarstvu dostavljalo primjedbe i sugestije na isti.

Analizom ponuđenog teksta Prednacrt Zakona o lovstvu ovo Ministarstvo je saglasno sa istim, s tim da dajemo slijedeće sugestije (mišljenje):

- u članu 40. stav (2) je potrebno propisati kojem organu je korisnik lovišta dužan dostavljati informacije iz stava (1) predmetnog člana,
- u članu 41. stav (1) potrebno je precizirati (dopuniti) da korisnik lovišta izrađuje (osniva) katastar lovišta,
- u članu 33. stav (5) je potrebno dodati da će Federacija, Kantoni i općine na čijem području se ostvaruje prihod od zakupa lovišta dodijeliti-vratiti sredstva korisniku lovišta, shodno kandidovanim projektima od strane korisnika lovišta za unapređenje lovstva, a na zahtjev Federalnog i Kantonalnog ministarstva i općine,

- u členu 88. stav (1) potrebno je propisati rok od jedne godine umjesto roka od dvije godine, da će Federalni ministar donijeti podzakonske akte od dana stupanja na snagu ovog Zakona,

S poštovanjem,

Obradivač akta:

*Amira Jusufbašić*  
Amira Jusufbašić



**MINISTAR**

*Amira Jusufbašić*  
**Amira Jusufbašić**

Broj: 08-26/7-204-13/17 M.B.  
Sarajevo, 21.3.2019. godine

PRILAZI		29-03-2019
Org. jedinica	Šifra	Šifra ministarstva
02	02	5309/19

SKUPŠTINA KANTONA....1-10 ✓  
VLADA KANTONA....1-10 ✓  
KANTONALNO MINISTARSTVO NADLEŽNO ZA LOVSTVO....1-10

05  
02-04-2019  
*[Signature]*

**Predmet: Mišljenje na Prednacrt Zakona o lovstvu, traži se -**

Poštovani,


Federalno ministarstva poljoprivrede, vodoprivrede i šumarstva izradilo je tekst Prednacrt Zakona o lovstvu. U izradi Prednacrt Zakona o lovstvu učestvovali su i predstavnici zainteresiranih strana: kantonalnih ministarstava nadležnih za oblast lovstva, lovačkih saveza, Šumarskog Fakulteta Univerziteta u Sarajevu i O.D. „Naše ptice“.

S obzirom da se radi o zajedničkoj nadležnosti federalne vlasti i kantona, neophodno nam je Vaše mišljenje na Prednacrt Zakona o lovstvu.

Tekst Prednacrt Zakona o lovstvu nalazi se na web stranici ovog Ministarstva [www.fmpvs.gov.ba](http://www.fmpvs.gov.ba), u izborniku: Šumarstvo (Aktuelnosti – Propisi u izradi).

Nakon što izvršite uvid u ponuđeni tekst predmetnog Zakona, potrebno je da Vaše mišljenje na isti dostavite ovom Ministarstvu poštom na adresu ul. Marka Marulića broj 2, Sarajevo, najkasnije do 20.4.2019. godine.

S poštovanjem,



DOSTAVLJENO:

1. Naslovu;
2. FMPVŠ, Sektor za šumarstvo i lovstvo;
3. Arhiva.



Broj: 01-02-5309-2/19  
Zenica, 12.04.2019. godine

15-04-2019

ZENIČKO-DOBOJSKI KANTON  
VLADA KANTONA  
n/r sekretara po ovlaštenju

**PREDMET: Dostava Prednacrt (federalnog) Zakona o lovstvu na mišljenje,**

U prilogu ovog dopisa, dostavljamo vam akt Ministarstva za poljoprivredu, šumarstvo i vodoprivredu Zeničko-dobojskog kantona broj: 05-02-5309-1/19 od 08.04.2019. godine, u čijem prilogu se nalazi akt Federalnog ministarstva poljoprivrede, vodoprivrede i šumarstva broj: 08-26/7-204-13/17 M.B od 21.03.2019. godine, koji su u Stručnoj službi Skupštine Zeničko-dobojskog kantona zaprimljeni 12.04.2019. godine, a kojim aktom kantonalnog Ministarstva za poljoprivredu, šumarstvo i vodoprivredu se Skupštini Kantona na nadležno postupanje dostavlja navedeni akt Federalnog ministarstva poljoprivrede, vodoprivrede i šumarstva, koji je naslovljen na Skupštine kantona 1-10, Vlade kantona 1-10 i na kantonalna Ministarstva nadležna za lovstvo 1-10, kojim se traži mišljenje na Prednacrt (federalnog) Zakona o lovstvu, s obzirom da se radi o zajedničkoj nadležnosti federalne vlasti i kantona, sa uputom da se tekst Prednacrt Zakona o lovstvu nalazi na web stranici navedenog Federalnog ministarstva, te napomenom da se mišljenje na isti dostavi Federalnom ministarstvu poštom najkasnije do 20.04.2019. godine.


S tim u vezi, a u cilju postupanja po navedenom aktu, molimo dostavu traženog mišljenja, koje bi Skupština Kantona imala u vidu prilikom razmatranja Prednacrt (federalnog) Zakona o lovstvu, te na osnovu kojeg bi Skupština Kantona mogla utvrditi svoje Mišljenje po istom, a nakon toga isto dostaviti Federalnom ministarstvu poljoprivrede, vodoprivrede i šumarstva.

S poštovanjem,

**PRILOZI: Kao u dopisu i isprintan (preuzet sa web stranice Federalnog ministarstva poljoprivrede, vodoprivrede i šumarstva) Prednacrt Zakona o lovstvu**

**DOSTAVLJENO:**

- 1 x Naslovu
- 1 x Komisija za poljoprivredu, šumarstvo, vodoprivredu i veterinarstvo /04-02
- 1 x Svim poslanicima Skupštine Kantona/05-03
- 1x Ministarstvo za poljoprivredu, šumarstvo i vodoprivredu ZDK/na znanje (bez priloga)
- 1x Federalno ministarstvo poljoprivrede, vodoprivrede i šumarstva, ul. Marka Marulića br. 2, 71000 Sarajevo/na znanje (bez priloga)
- 1 x 02
- 1 x 05-01
- 1 x 04-01
- 1x U spis predmeta/03 "R"



# PREDNACRT ZAKONA O LOVSTVU

## I – OSNOVNE ODREDBE

### Član 1. (Predmet Zakona)

- (1) Ovim zakonom uređuje se: ustanovljenje i dodjela lovišta, uzgoj, zaštita, lov i korištenje divljači i njezinih dijelova, katastar lovišta, lovnoprivredna osnova i planiranje, lovočuvarska služba, upravni i inspekcijski nadzor nad provođenjem ovog zakona, kaznene odredbe i druga pitanja od značaja za oblast lovstva na teritoriji Federacije Bosne i Hercegovine (u daljem tekstu: Federacija).
- (2) Lovstvo u smislu ovog zakona, predstavlja javnu djelatnost i obuhvata mjere zaštite i uzgoja divljači, uređenje lovišta, lovljenje divljači i racionalnu upotrebu divljači i lovišta, koji doprinosi očuvanju biološke raznolikosti ekoloških sistema i ekološke ravnoteže prirodnih staništa divljači.

### Član 2. (Definicije pojmova)

**U ovom zakonu u upotrebi su pojmovi sa sljedećim značenjem:**

1. **Divljač**, u pogledu ovog zakona su određene vrste životinja koje slobodno žive u prirodi;
2. **Dozvola za lov divljači** je isprava kojom se lovcu ili grupi lovaca dozvoljava da lovi krupnu i sitnu divljač.
3. **Korisnik lovišta** je pravno lice koje je na osnovu odredbi ovog zakona dobilo lovište na gospodarenje;
4. **Lov** je skup osmišljenih aktivnosti čovjeka, u svrhu odstrjela ili hvatanja životinja, ovim zakonom označenih kao divljač;
5. **Lovište** je određena površina zemljišta koja predstavlja zaokruženu prirodnu cjelinu u kojoj postoje ekološki i drugi uslovi za uzgoj, zaštitu, lov i racionalno korištenje divljači;
6. **Lovna godina** je period od 1. aprila tekuće godine do 31. marta slijedeće godine.
7. **Lovnoprivredna osnova** je planski akt kojim se uređuje gazdovanje divljači i lovištem za desetogodišnji period;
8. **Lovnoproductivne površine** su one površine na kojima postoje uslovi za opstanak (hrana, voda, zaklon i odgovarajući prostor), reprodukciju i razvoj određene vrste divljači.
9. **Lovne površine** u lovištu su sve one površine na kojima korisnik lovišta može nesmetano provoditi lovno-privredne mjere, te radove na zaštiti i uzgajanju divljači, uređenju lovišta i korištenju jedne ili više vrsta divljači, a da pri tome nisu ugroženi interesi drugih, odnosno da se provođenjem lovstva na tim površinama ne dovode u opasnost druga lica ili nanose veće štete.

10. **Otvoreno lovište** je lovište u kojem je moguća neometana dnevna i sezonska migracija divljači;
11. **Ograđeno lovište** je lovište u kojem je smanjena mogućnost (prirodno ili ograđeno preprekama) migracije divljači;
12. **Pravo lova** je ovlaštenje da se na određenoj površini zemljišta i voda provedu radnje i poduzimaju mjere uzgoja, zaštite i racionalnog korištenja divljači;
13. **Program uzgoja** divljači je planski i privredni akt kojim se potanko uređuje uzgoj, zaštita, lov i upotreba divljači u uzgajalištima divljači;
14. **Trofej divljači** predstavlja divljač ili određeni dio divljači, obrađen na odgovarajući način, tako da se može ocjenjivati prema međunarodnim formulama za ocjenu trofeja;
15. **Uzgajalište divljači** je ograđeni dio lovišta namijenjen intenzivnom uzgoju divljači za potrebe naseljavanja, povećanja brojnosti u lovištima, lov i proizvodnju mesa;
16. **Vrhunski trofej** divljači je trofej ocijenjen većim brojem bodova od evidentiranog najjačeg trofeja pojedine vrste divljači u Federaciji.

### **Član 3.** **(Vlasništvo nad divljači)**

- (1) Divljač je državno vlasništvo i dobro od općeg interesa koje uživa posebnu brigu i zaštitu.
- (2) Ulovljena, ranjena i uginula divljač i njeni dijelovi pripadaju korisniku lovišta, a na zemljištima i vodama izvan lovišta pripada kantonalnom ministarstvu nadležnom za poslove lovstva (u daljem tekstu: kantonalno ministarstvo), ili pravnom ili fizičkom licu kojem je povjerena zaštita divljači izvan lovišta.

## **II. LOVSTVO – KORISNICI LOVIŠTA I LOVAČKA UDRUŽENJA**

### **Član 4.** **(Podjela lovstva prema namjeni)**

- (1) Prema namjeni lovstvo može biti gospodarsko, sportsko, gospodarsko-sportsko i sa posebnom namjenom.
- (2) Pod gospodarskim lovstvom podrazumjeva se bavljenje lovstvom u cilju sticanja dobiti.
- (3) Pod sportskim lovstvom podrazumjeva se bavljenje lovstvom radi lične razonode i rekreacije.
- (4) Pod gospodarsko-sportskim lovstvom podrazumjeva se kombinacija gospodarskog i sportskog lovstva.
- (5) Lovstvo sa posebnom namjenom provodi se u lovištima sa posebnom namjenom i podrazumjeva bavljenje lovstvom u cilju zaštite pogodnih staništa rijetkih, prorijeđenih i vrijednih vrsta divljači, naučnih istraživanja, nastave, kao i zaštite ugroženih životinja, a u skladu sa Zakonom o zaštiti prirode ("Službene novine Federacije BiH", broj 66/13).

### **Član 5.**

## **(Lov divljači)**

Lovljenje divljači obuhvata: traženje, dočekivanje, posmatranje, slijeđenje, odstrjel i hvatanje žive divljači, lovljenje pticama grabljivicama, sakupljanje odstrijeljenje i uginule divljači i njezinih dijelova.

### **Član 6. (Prostori koji ne ulaze u lovište)**

- (1) Za vršenje lovstva osnivaju se lovišta.
- (2) U lovište ne ulaze:
  - a. izgrađeno i neizgrađeno građevinsko zemljište;
  - b. javni putevi i druge javne površine uključujući i zaštitni pojas do 300 m od naselja;
  - c. određeni dijelovi prirode koji su proglašeni posebno zaštićenim objektima prirode po propisima o zaštiti prirode u kojima je aktom o proglašenju ili posebnim aktom zabranjen lov (nacionalni parkovi, parkovi prirode, strogi rezervati, specijalni zoološki i ornitološki rezervati i drugi posebno zaštićeni objekti prirode);
  - d. more i privredni ribnjaci sa obalnim zemljištem koji služe za korištenje ribnjaka;
  - e. rasadnici, voćni i lozni nasadi namijenjeni intenzivnoj proizvodnji na površini do 100 ha, ako su ograđeni ogradom koja sprečava prirodnu migraciju dlakave divljači;
  - f. druge površine na kojima je aktom o proglašenju njihove namjene zabranjen lov.

### **Član 7. (Zabrana lova divljači izvan lovišta)**

- (1) Na površinama zemljišta i na vodama izvan lovišta divljač je dužan zaštititi vlasnik zemljišta, pravno ili fizičko lice i kantonalno ministarstvo na čijem se području nalazi zemljište i vode koje se koriste.
- (2) Zabranjen je lov divljači na zemljištima i vodama izvan lovišta.
- (3) Izuzetno od stava 1. ovog člana, u slučajevima kada se radi o površinama zemljišta većim od 100 ha pravnih ili fizičkih lica koja koriste ta zemljišta, kantonalno ministarstvo povjerit će zaštitu divljači na takvim površinama drugim pravnim ili fizičkim licima.

### **Član 8.**

Lovištima se gospodari na osnovu lovnoprivredne osnove i godišnjeg plana gospodarenja.

### **Član 9. (Pravo lova divljači)**

- (1) Pravo lova divljači imaju građani koji ispunjavaju uvjete određene ovim zakonom, propisima donesenim na osnovu ovog zakona i opštih akata pravnih lica (lovačke organizacije i dr.) koja gospodare lovištem.

- (2) Godišnji ulov divljači može se vršiti samo u granicama godišnjeg plana gospodarenja.

**Član 10.**  
**(Korisnici lovišta i dužnosti)**

- (1) Korisnici lovišta su pravna lica koja su na osnovu odredbi ovog zakona dobila lovište na gospodarenje.
- (2) Korisnici lovišta, u smislu ovog zakona, mogu biti lovačka udruženja, privredna društva šumarstva, te ostala pravna lica registrirana za bavljenje lovstvom.
- (3) Korisnici lovišta mogu se dobrovoljno povezivati u lovačke asocijacije radi unapređenja i ostvarivanja zajedničkog ili općeg interesa ili cilja u skladu sa odredbama Zakona o udruženjima i fondacijama («Službene novine Federacije BiH», broj: 45/02).
- (4) Korisnici lovišta u smislu ovoga Zakona ne mogu biti pravna lica koja su tokom lovne godine dva ili više puta kažnjavana za prekršaj iz člana 82. stav 1. tač. 1., 2., 3., 4. i 5. ovog zakona.
- (5) Korisnik lovišta je dužan:
- a. da izvrši inventuru životinjskih vrsta i stanja lovišta najmanje jednom godišnje;
  - b. da obezbijedi finansijska sredstva za provođenje lovnoprivredne osnove, za sanaciju šteta na divljači i lovištu, kao i nadoknadu štete koju pričinii divljač;
  - c. da ima stručnu službu, odnosno stručno lice za sprovođenje lovnoprivredne osnove;
  - d. da ima organizovanu lovočuvarsku službu;
  - e. da ima lovačke pse odgovarajuće pasmine za lovište koje koristi, koji posjeduje rodni list (rodovnik, pedigree) jedne od članica Međunarodne kinološke federacije (FCI) i koji imaju pozitivnu ocjenu u obliku (eksterijeru) i imaju položen ispit urođenih osobina;
  - f. da ima lovačkog psa osposobljenog za praćenje krvnog traga ili krvosljednika s položenim ispitom, ako u lovištu koje koristi ima predviđen odstrjel krupne divljači ili da ima ugovor o korištenju psa sa pravnim ili fizičkim licem koje posjeduje takvog psa.

**Član 11.**  
**(Lovačka udruženja)**

Lovačka udruženja formiraju se radi organiziranog bavljenja lovstvom, ostvarenja općeg interesa za unapređenje uzgoja i zaštite lovstva i iskorištavanja divljači, zaštite prirode i okoliša u očuvanju prirodnog staništa divljači, njegovanja lovačke etike i običaja ili drugih ciljeva kroz sportsko-rekreacione i ekološke aktivnosti.

**Član 12.**  
**(Lovački savezi)**

- (1) Lovački savezi u Federaciji su samostalne organizacije u koje su svojevrijemno učlanjeni korisnici lovišta i druge organizacije i udruženja zainteresirani za razvoj lovstva i na koje se primjenjuju sve odredbe zakona koje su inače propisane za udruženja.
- (2) Lovački savez, u smislu ovog zakona, obavlja svoju osnovnu djelatnost (za koju je registriran), te obavlja poslove koje su mu, kao javna ovlaštenja, povjereni ovim zakonom, odnosno za koje je ovlašten, a naročito:
  - a. unapređenja lovstva;
  - b. pružanje stručne pomoći kod donošenja i provođenja mjera gospodarenja lovištem i obrazovanja lovaca;
  - c. dosljedno provođenje zakona i drugih propisa o lovstvu i davanje prijedloga za njihovo unapređenje;
  - d. ostvarivanje jedinstvene lovne politike iz oblasti lovstva, kao i ostvarivanje odnosa sa inozemnim lovačkim udruženjima;
  - e. realizacije lovnog menadžmenta.

### III – DIVLJAČ I NJENA ZAŠTITA

#### Član 13.

##### (Vrste divljači)

- (1) Divljač u smislu ovog zakona su sljedeće vrste životinja:

##### a) DLAKAVA DIVLJAČ (SISARI)

1. obični jelen (*Cervus elaphus*)
2. jelen lopatar (*Dama dama*),
3. srna (*Capreolus capreolus*),
4. divokoza (*Rupicapra rupicapra*),
5. muflon (*Ovis musimon*)
6. divlja svinja (*Sus scrofa*),
7. mrki medvjed (*Ursus arctos*)
8. divlja mačka (*Felis silvestris*)
9. vuk (*Canis lupus*)
10. čagalj (*Anis aureus*)
11. dabar (*Castor fiber* L.)
12. mungos (*Herpestes auropunctatus*)
13. rakunopas (*Nyctereutes procyonoides*)
14. lisica (*Vulpes vulpes*)
15. kuna zlatica (*Martes martes*)
16. kuna bjelica (*Martes foina*)
17. smeđi tvor (*Putorius putorius*)
18. velika lasica – hermelin (*Mustela erminea*)

19. lasica mala (*Mustela nivalis*)
20. jazavac (*Meles meles*)
21. zec (*Lepus europeaus*)
22. bizamski pacov (*Ondatra zibethicus*)
23. puh obični (*Glis glis*).

#### **b) PERNATA DIVLJAČ (PTICE)**

1. Patka gluhara (*Anas platyrhynchos*)
2. Patka kržulja (*Anas crecca*)
3. Liska crna (*Fulica atra*)
4. Veliki tetrijeb - mužjak (*Tetrao urogallus*)
5. Lještarka (*Bonasa bonasia*)
6. jarebica kamenjarka – grivna (*Alectoris graeca*)
7. Jarebica poljska-trčka (*Perdix perdix*)
8. Prepelica pućpura (*Coturnix coturnix*)
9. Fazan (*Phasianus phasianus*)
10. Šumska šljuka (*Scolopax rusticola*)
11. Barska šljuka (*Gallinago gallinago*)
12. Golub grivnjaš (*Columba polumbus*)
13. Vrana siva (*Corvus cornix*)
14. Čavka (*Corvus monedula*)
15. Svraka (*Pica pica*)
16. Šojka (*Garrulus glandarius*)

(2) Dlakava i pernata divljač iz stava 1. ovog člana dijeli se na krupnu i sitnu divljač i to:

#### **a) KRUPNA DIVLJAČ**

Krupna divljač u smislu ovog zakona su: medvjed, vuk, ris, obični jelen, jelen lopatar, srna, muflon, divokoza, divlja svinja i veliki tetrijeb.

#### **b) SITNA DIVLJAČ**

Sitna divljač su sve druge vrste određene kao divljač ovim zakonom, izuzev navedenih u tački a. ovog stava.

(3) Ako se na teritoriji Federacije pojavi ili unese nova vrsta divljači, njen status divljači rješenjem će privremeno odrediti federalni ministar poljoprivrede, vodoprivrede i šumarstva (u daljem tekstu: federalni ministar), dok se to pitanje ne uredi ovim zakonom.

## Član 14. (Uzgoj i zaštita divljači)

- (1) Uzgoj i zaštita divljači obuhvata sve mjere i radnje kojima se pomaže razmnožavanje i opstanak divljači, a naročito:
  - a. lovostaj za određene vrste divljači;
  - b. privremena zabrana lova divljači;
  - c. provedba radnji koje uvjetuju opstanak i razmnožavanje divljači koja trajno ili sezonski živi u lovištu, te mjere za očuvanje i poboljšanje staništa;
  - d. održavanje utvrđene brojnosti, omjera spolova i starosti populacije divljači koja se uzgaja;
  - e. osiguravanje uvjeta za razmnožavanje i vođenje mladunčadi;
  - f. unos i čuvanje divljači radi postizanja brojnosti utvrđene lovnoprivrednom osnovom i programom uzgoja;
  - g. osiguranje provođenja preventivnih dijagnostičkih, kurativnih i higijensko-zdravstvenih mjera u lovištima i ostalim prostorima gdje se divljač uzgaja ili obitava radi zdravstvene zaštite divljači;
  - h. smanjenje broja divljači koja čini štetu na podnošljiv broj, te uklanjanje pasa i mačaka skitnica;
  - i. spasavanje divljači od elementarnih nepogoda;
  - j. provođenje mjera za osiguranje dovoljne količine kvalitetne hrane i pitke vode;
  - k. podizanje i održavanje lovno-tehničkih i lovno-uzgojnih objekata;
  - l. preduzimanje preventivnih mjera (istjerivanje divljači) prilikom obavljanja poljoprivrednih i drugih radova, te upotreba zaštitnih naprava na poljoprivrednim strojevima;
  - m. upotreba sredstava za zaštitu bilja ili drugih hemijskih sredstava na propisan način i preduzimanje preventivnih mjera pri njihovoj upotrebi, ili paljenje strništa, kukuruzišta, tršćaka i sl.;
  - n. korištenje određenih pasmina radno ispitanih lovačkih pasa;
  - o. čuvanje lovišta;
  - p. suzbijanje nezakonitog lova;
  - r. poboljšanje staništa divljači;
  - s. higijensko-zdravstvene mjere;
  - t. sprečavanje smanjenja i presijecanja površina;
  - u. uklanjanje štetočina.
- (2) Za vrijeme zabrane lova ili lovostaja određena vrsta divljači se nesmije loviti, proganjati, ili namjerno uznemiravati, ako zakonom nije drukčije određeno.
- (3) Zabranjeno je lovljenjem ili na drugi način ugrozi opstanak bilo koje vrste divljači u prirodi.
- (4) Odstrjel bolesne ili ranjene divljači (sanitarni odstrjel) dozvoljen je i u vrijeme zabrane lova i lovostaja, a isti može vršiti samo stručna služba korisnika lovišta.
- (5) Zabranjeno je loviti ženku dlakave divljači kada je visoko bremenita, ili dok vodi mladunčad, pernatu divljač kad sjedi na jajima i dok hrani mladunčad, uništavanje i prisvajanje mladunčadi, te uništavanje i oštećivanje legla, gnijezda i jaja divljači.
- (6) Izuzetno od stava 5. ovog člana može se dopustiti lov za potrebe nauke, nastave, lovnu obuku ptica grabljivica, za potrebe zooloških vrtova, muzeja, te sokolarskih i

kinoloških priredbi uz predhodno odobrenje Federalnog ministarstva poljoprivrede, vodoprivrede i šumarstva (u daljnjem tekstu: Federalno ministarstvo).

- (7) U postupku izdavanja odobrenja korisnici ove vrste lova dužni su podnijeti izvještaj Federalnom ministarstvu o razlozima lova, količini i vrsti divljači, vremenu vršenja lova, mjestu načinu i sredstvima lova, a sve to uz sudjelovanje nadležnog inspektora, predstavnika Federalnog ministarstva i korisnika lovišta (a po potrebi i drugih zainteresiranih stranaka), uz uvjet da se sačini zapisnik na licu mjesta o preduzetim radnjama.
- (8) Federalni ministar ukinut će odobrenje iz stava 6. ovog člana u slučajevima kada korisnik postupi suprotno odredbama stava 7. ovog člana.

### **Član 15. (Zabrana lova)**

1. Stalna zabrana lova određuje se za vrste divljači koje se nalaze na Crvenoj listi ugroženih divljih vrsta i podvrsta biljaka, životinja i gljiva, utvrđenoj na osnovu Zakona o zaštiti prirode („Službene novine Federacije BiH”, broj: 66/13) i u skladu sa međunarodnim konvencijama kojih je Bosna i Hercegovina potpisnica.
2. Izuzetno od stava 1. ovog člana, lov mrkog medvjeda obavlja se na osnovu Plana gospodarenja mrkim medvjedom na teritoriji Federacije i godišnjeg akcijskog plana gospodarenja mrkim medvjedom za područje kantona.
3. Plan gospodarenja mrkim medvjedom na teritoriji Federacije izrađuje i donosi Federalno ministarstvo uz prethodnu suglasnost ministarstva nadležnog za poslove zaštite prirode.
4. Godišnji akcijski plan gospodarenja mrkim medvjedom za područje kantona izrađuje i donosi kantonalno ministarstvo uz prethodnu saglasnost ministarstva nadležnog za poslove zaštite prirode koja se izdaje na osnovu mišljenja Federalnog ministarstva.
5. Izrada Plana gospodarenja mrkim medvjedom na teritoriji Federacije finansira se iz Budžeta Federacije.

### **Član 16. (Lovostajem zaštićena divljač i uzgojna područja)**

- (1) Lovostajem zaštićena divljač je: srna, obični jelen, jelen lopatar, zec, kuna zlatica, kuna bjelica, divlja svinja, veliki tetrijeb-mužjak, fazan, prepelica, jarebica kamenjarka, jarebica poljska, jarebica šumska-mužjak, šljuke, divlji golubovi, grlica, divlje patke, divlje guske i crna liska.
- (2) Federalni ministar će pravilnikom propisati vrijeme lova lovostajem zaštićene divljači i utvrditi koje se ptice i sisari smatraju korisnim za poljoprivredu i šumarstvo.

### **Član 17. (Privremena zabrana lova)**

- (1) Privremena zabrana lova određuje se za vrste divljači čija je brojnost u lovištu osjetno smanjena usljed vremenskih nepogoda, bolesti, požara ili iz nekih drugih razloga, a koju treba zaštititi na određeno vrijeme u cilju povećanja njihove brojnosti.
- (2) Zabranu iz stava 1. ovog člana određuje korisnik lovišta.
- (3) Zabranu iz stava 1. ovog člana propisuje federalni ministar za područje više kantona i kantonalni ministar za područje kantona, ako tu zabranu ne odredi korisnik lovišta.

#### **Član 18.**

##### **(Odobrenje za smanjenje broja lovostajem zaštićene divljači)**

- (1) Ako od lovostajem zaštićene divljači nastupi direktna opasnost po život i zdravlje ljudi, ili za državnu imovinu i za imovinu građana, zaštićena divljač može se odstrijeliti, odnosno njen broj smanjiti, bez obzira na vrijeme zaštite i godišnji plan gospodarenja.
- (2) Odobrenje za smanjenje broja lovostajem zaštićene divljači i način izvršenja izdaje federalni ministar na osnovu zahtjeva zainteresiranih, a po pribavljenom mišljenju korisnika lovišta i nadležne veterinarske službe u slučaju pojave bolesti.

#### **Član 19.**

##### **(Zabrana lova divljači i držanja u ograđenom prostoru)**

- (1) Zabranjen je lov ptica i sisara korisnih za poljoprivredu i šumarstvo, kao i kvarenje i uništavanje njihovih gnijezda, legla i skupljanje i uništavanje mladunčadi i jaja, ako ovim zakonom nije drukčije određeno.
- (2) Zabranjeno je hvatanje divljači i držanje u zatvorenom ili ograđenom prostoru, ako ovim zakonom nije drukčije riješeno, odnosno ako to nije u svrhu uzgoja divljači ili poboljšanja prirodnog fonda iste vrste.

#### **Član 20.**

##### **(Zabrana puštanja pasa i mačaka u lovištu)**

- (1) Ovčarski psi mogu biti u lovištu samo uz stado.
- (2) Pse i mačke njihovi vlasnici, a pastiri pastirske pse, ne smiju puštati da se kreću lovištem bez nadzora na udaljenosti 300 m od nastambe vlasnika, odnosno stada.
- (3) Korisnik lovišta ima pravo i dužnost u lovištu ukloniti pse i mačke koji se kreću lovištem protivno odredbi stava 2. ovog članka bez nadoknade vlasniku psa ili mačke.
- (4) Nije dozvoljeno ukloniti lovačke pse koji u organiziranom lovu, ispitima ili utakmicama pasa u gonjenju divljači pređu u drugo lovište.
- (5) Vlasnici pasa odgovorni su za štetu koju njihovi psi počine u lovištu i nadoknađuju je korisniku lovišta.

#### **Član 21.**

##### **(Unošenje u lovište nove vrste divljači)**

Unošenje u lovište nove vrste divljači i ponovno naseljavanje nestalih vrsta divljači provodi se u skladu sa planovima gazdovanja lovištem i Zakonom o zaštiti prirode ("Službene novine Federacije BiH", broj 66/13).

#### **Član 22.**

##### **(Odobrenje hvatanja i držanja divljači u zatvorenom/ograđenom prostoru)**

- (1) Za potrebe naučnog istraživanja, obrazovanja, zooloških vrtova, muzeja, naseljavanje lovišta i suzbijanja zaraznih bolesti, federalni ministar može odobriti hvatanje i držanje divljači u zatvorenom, odnosno, ograđenom prostoru.
- (2) Federalni ministar donosi rješenje kojim se propisuju način i mjere koje će se pri tome provoditi, te period važenja odobrenja.

#### **Član 23.**

##### **(Zabranjene aktivnosti u lovištu, uklanjanje smeća i poboljšavanje životnih uslova za divljač)**

- (1) Zabranjeno je:
  - a. hvatanje divljači mrežama;
  - b. trovanje divljači;
  - c. žetva i košenje poljoprivrednim strojevima koji nemaju ugrađene uređaje za plašenje i istjerivanje divljači;
  - d. paljenje korova, strnjika, trstika, trave i drugog raslinja u lovištima;
  - e. oblaganje otvorenih kanala, akumulacija, jezera i obala vodotoka plastičnim i drugim materijalima na način na koji bi ugrožavao divljač;
  - f. uporaba hemijskih preparata na način i u količini koji ugrožavaju zdravlje i opstanak divljači;
  - g. odlaganje otpada, smeća ili nečistih tvari u prostoru lovišta.
- (2) Ako se za zaštitu poljoprivrednih i šumskih kultura upotrebljavaju hemijska sredstva štetna za divljač, upotreba tih sredstava mora se vršiti na način koji je najmanje opasan za divljač.
- (3) Radi preduzimanja preventivnih mjera vlasnici, odnosno korisnici zemljišta dužni su najmanje tri dana prije upotrebe sredstava obavijesti korisnika lovišta o mjestu, vremenu i načinu upotrebe sredstava iz stava 2. ovog člana.
- (4) Korisnici lovišta obavezni su iz lovišta ukloniti otpad i smeće i imaju pravo za nadoknadu troškova od fizičkog ili pravnog lica koji su otpad ili smeće odložili u lovištu.
- (5) Korisnici lovišta moraju održavati i poboljšavati životne uslove za divljač u lovištu, poštujući zahtjeve prirodnog gospodarenja šumama (stvarati prostor za parenje i odmor divljači) i zahtjeve zaštite životinja i biljaka, te zahtjeve javnosti.

#### **Član 24.**

##### **(Nošenje oružja u lovištu)**

- (1) Zabranjen je lov i unošenje oružja u lovište koje nije lovačko (vojničko, poluautomatsko i automatsko oružje sa spremnikom koji može sadržavati više od dva naboja municije, malokalibarsko oružje i samostrijel).

- (2) Zabranjeno je kretati se izvan javnih putova, ili voziti po tuđem lovištu sa lovačkim oružjem koje nije u futroli ili prtljažniku automobila i ispražnjeno.
- (3) Zabranjeno je kretati se lovištem sa lovačkom puškom i/ili lovačkim psima i/ili drugim sredstvima za lov bez odobrenja korisnika lovišta.

## **IV - LOVIŠTA**

### **Član 25.**

#### **(Osnivanje lovišta i podjela prema namjeni)**

- (1) Lovištem se smatraju površine zemljišta, šuma i voda koje predstavljaju prostornu, prirodnu i lovnoprivrednu cjelinu u kojoj postoje uslovi za trajan opstanak, uzgoj, razmnožavanje, zaštitu i korištenje divljači, bez obzira na vlasništvo.
- (2) Lovište osniva skupština kantona na prijedlog nadležnog kantonalnog ministarstva.
- (3) Akt o osnivanju lovišta obavezno sadrži: naziv lovišta, granice i ukupnu površinu lovišta, vrste divljači koje ga naseljavaju, divljač koja je pod posebnom zaštitom i druge potrebne podatke.
- (4) Prema namjeni lovišta mogu biti: sportsko-privredna, privredna i lovišta sa posebnom namjenom (posebna lovišta).
- (5) Pod privrednim lovištem podrazumijeva se lovište čija je osnovna namjena bavljenje lovstvom u cilju sticanja dobiti.
- (6) Pod sportsko-privrednim lovištem podrazumijeva se lovište čija je namjena sportsko-privrednog karaktera.
- (7) Na površinama šuma sa posebnom namjenom (naučnog, kulturnog, vjerskog, historijskog i dr. značaja) kao i na površinama koje predstavljaju izuzetno pogodna staništa rijetkih, prorijeđenih i vrijednih vrsta divljači, Vlada Federacije Bosne i Hercegovine (u daljem tekstu: Vlada Federacije), svojom odlukom, a na prijedlog federalnog ministra može osnovati posebno lovište uz prethodno pribavljenu saglasnost vlade kantona.
- (8) Ako se lovište nalazi na području dva ili više kantona, saglasnost za osnivanje posebnog lovišta daju vlade kantona.
- (9) Aktom o osnivanju lovišta iz st. 7. i 8. ovog člana Vlada Federacije određuje i korisnika lovišta.

### **Član 26.**

#### **(Nelovne površine)**

- (1) Lovnim površinama ne smatraju se: naselja, groblja, javni putevi, plantažni voćnjaci i vinogradi, parkovi u naseljima, objekti za liječenje, odmor i rekreaciju, zračne luke, dvorišta industrijskih i drugih objekata, kao i druge površine na kojima je aktom o proglašenju njihove namjene zabranjen lov.
- (2) Ograđeni prostori za umjetni uzgoj divljači se, također, ne smatraju lovnom površinom.

### **Član 27.**

#### **(Podjela lovišta prema nadmorskoj visini)**

- (1) Prema nadmorskoj visini lovišta mogu biti: dolinska (nizinska), brdska i planinska.
- (2) Nizinskim lovištem smatra se lovište u kojem je više od 50% površine ispod 400 m nadmorske visine.
- (3) Brdskim lovištem smatra se lovište u kojem je više od 50% površine lovišta između 400 i 1.000 m nadmorske visine.
- (4) Planinskim lovištem smatra se lovište u kojem je više od 50% površine iznad 1.000 m nadmorske visine.

#### **Član 28.**

##### **(Otvorena lovišta i ograđena lovišta i ograđivanje lovišta)**

- (1) Lovišta se mogu ustanoviti kao: otvorena lovišta i ograđena lovišta.
- (2) Otvoreno lovište je lovište u kojem je omogućena dnevna i sezonska migracija dlakave i pernate divljači. Ovo lovište ne može biti manje od 1.000 ha za nisku i 3.000 ha za visoku divljač.
- (3) Ograđeno lovište je lovište koje je ograđeno prirodnim (široki vodotoci, velike vodene površine i sl.) ili umjetnim (ograde ili slični uređaji ili građevine i sl.) preprekama koje sprečavaju ili znatno umanjuju mogućnost da divljač, koja se u njemu prvenstveno uzgaja, štiti i lovi, napusti tu površinu, a ne može biti manje od 400 ha.
- (4) Ograđivanje lovišta, čija površina ne može biti manja od 400 ha, u cilju intenzivnog gospodarenja, ako nije predviđeno lovnom osnovom, može se vršiti samo uz odobrenje Federalnog ministarstva.

#### **Član 29.**

##### **(Uzgajalište divljači)**

- (1) Uzgajalište divljači je ograđeni dio lovišta na kojima se mogu uzgajati pojedine vrste divljači za proizvodnju većeg broja kvalitetne i zdrave divljači namijenjene za reprodukciju, potrebe naseljavanja i povećanja brojnosti u lovištima, lov i proizvodnju mesa.
- (2) Uzgajalište divljači može se ustanoviti i na zemljištu u privatnom vlasništvu ako su ispunjeni kriteriji propisani stavom 1. ovog člana.
- (3) Dozvolu za ustanovljavanje uzgajališta divljači iz stava 2. ovog člana izdaje kantonalno ministarstvo na zahtjev vlasnika privatnog posjeda, na osnovu programa uzgoja divljači kojim se utvrđuje kapacitet za uzgoj te divljači i kojim se dokazuje da će u uzgajalištu biti osigurani uslovi da divljač može očuvati svoje prirodne osobine.
- (4) Program uzgoja divljači iz stava 3. ovog člana može izraditi lice koje ispunjava uslove za izradu lovnoprivredne osnove.
- (5) Federalni ministar donosi pravilnik o načinu uspostave uzgajališta divljači.

#### **Član 30.**

##### **(Postupak osnivanja lovišta i obilježavanja granica)**

- (1) Korisnik lovišta dužan je u roku od šest mjeseci od dana preuzimanja lovišta na korištenje obilježiti granice lovišta.
- (2) Postupak osnivanja lovišta i obilježavanja granica lovišta pravilnikom propisuje federalni ministar.

#### **Član 31.**

##### **(Dodjela privrednih lovišta i koncesiona naknada)**

- (1) Privredno lovište dodjeljuje se na korištenje u skladu sa ovim zakonom, Zakonom o koncesijama ("Službene novine Federacije BiH", br. 40/02 i 61/06) - (u daljem tekstu: Zakon o koncesijama) i zakonom o koncesijama kantona.
- (2) Pravo učešća na javnom pozivu za dodjelu privrednog lovišta na koncesiju imaju pravna lica registrovana za bavljenje lovstvom.
- (3) Na prijedlog kantonalnog ministarstva Vlada kantona će propisati uslove, kriterije i postupak dodjele privrednih lovišta na koncesiju.
- (4) Nadležni kantonalni organ donosi odluku o dodjeli koncesije za korištenje lovišta najpovoljnijem ponuđaču koji je ispunio i zadovoljio sve kriterije utvrđene u javnom pozivu.
- (5) Godišnja koncesiona naknada za korištenje lovišta je najpovoljnija cijena koja se postigne na javnom pozivu i ne može biti manja od 30% planiranog godišnjeg prihoda od odstrjela divljači iz važeće lovnoprivredne osnove ili privremenog godišnjeg plana gospodarenja divljači.
- (6) Koncesiona naknada iz stava 5. ovog člana plaća se u skladu sa kantonalnim zakonom o koncesijama.
- (7) Prikupljena sredstva iz stava 6. ovog člana koriste se za unapređenje lovstva, kao i druge obaveze propisane ovim zakonom.
- (8) Jednom pravnom licu može se dodijeliti više lovišta na korištenje.
- (9) Rok na koji se dodjeljuje koncesija za korištenje lovišta ne može biti kraći od 10 godina, a ni duži od 30 godina.
- (10) Korisnik lovišta, lovište ili njegove dijelove ne može davati pod zakup ili ustupiti drugom korisniku.

#### **Član 32.**

##### **(Dodjela sportsko-privrednih lovišta)**

- (1) Sportsko-privredno lovište dodjeljuje se u zakup putem javnog poziva koji raspisuje kantonalno ministarstvo.
- (2) Pravo učešća na javnom pozivu za dodjelu sportskoprivrednog lovišta u zakup imaju lovačka udruženja.
- (3) Nadležno kantonalno ministarstvo će propisati uslove, kriterije i postupak dodjele sportsko-privrednih lovišta u zakup.
- (4) Prije raspisivanja javnog konkursa za dodjelu sportskoprivrednog lovišta kantonalno ministarstvo propisuje način vrednovanja ponuda za dodjelu lovišta na korištenje.

#### **Član 33.**

##### **(Odluka o dodjeli sportsko-privrednog lovišta, zakupnina)**

- (1) Vlada kantona, na prijedlog resornog kantonalnog ministarstva donosi odluku o dodjeli sportsko-privrednih lovišta u zakup najpovoljnijem ponuđaču koji ispunjava kriterije utvrđene u javnom pozivu.
- (2) Kantonalni ministar imenuje komisiju za proceduru dodjele sportsko-privrednih lovišta u zakup.
- (3) Godišnja zakupnina za korištenje lovišta je najpovoljnija cijena koja se postigne na javnom pozivu i ne može biti manja od 10% planiranog godišnjeg prihoda od odstrjela divljači iz važeće lovnoprivredne osnove ili privremenog godišnjeg plana gospodarenja divljači, a u skladu sa cjenovnikom odstrjela i upotreba divljači te drugih usluga u lovištu na bazi tržišne vrijednosti, koji se donosi na osnovu člana 60. stav 6. ovog zakona.
- (4) Zakupnina se uplaćuje u korist budžeta kantona u iznosu od 60%, u korist Budžeta Federacije Bosne i Hercegovine (u daljem tekstu: Budžet Federacije) u iznosu od 20% i u budžet općine na čijem području se ostvaruje prihod u iznosu od 20% najkasnije do 31. januara za tekuću lovnu godinu.
- (5) Prikupljena sredstva iz stava 3. ovog člana koriste se za unapređenje lovstva, kao i druge obaveze propisane ovim zakonom.
- (6) Lovište se daje u zakup na period od 10 lovnih godina.
- (7) Jednom korisniku lovišta u zakup se može dati više lovišta.
- (8) Korisnik lovišta, lovište ili njegove dijelove ne može davati u podzakup ili ustupiti drugom korisniku.

#### **Član 34.**

##### **(Dodjela posebnog lovišta na korištenje)**

- (1) Posebno lovište se daje na korištenje na period od 10 lovnih godina.
- (2) Posebno lovište se daje na korištenje korisniku državnih šuma na kojima je isto ustanovljeno.
- (3) Posebno lovište koje se nalazi u okviru područja zaštićenog u skladu sa Zakonom o zaštiti prirode („Službene novine Federacije BiH“, broj: 66/13) daje se na korištenje upravitelju tog zaštićenog područja.
- (4) Jednom pravnom licu može se dati više posebnih lovišta na privređivanje.
- (5) Korisnik posebnog lovišta, posebno lovište ili njegove dijelove ne može davati pod zakup ili ustupiti drugom korisniku.

#### **Član 35.**

##### **(Način korištenja lovišta)**

- (1) Lovište se daje na gospodarenje jednom pravnom licu koje ponudi najpovoljnije uvjete za gospodarenje lovištem i unapređenje lovišta (objekte, uređaje i druga sredstva za uzgoj i zaštitu divljači, stručne kadrove i sl.).
- (2) Korisnik zemljišta i voda na kojem je osnovano lovište ima pod jednakim uvjetima iz stava 2. ovog člana pravo prvenstva u dobijanju lovišta na gospodarenje.
- (3) Korisnik kome je dato lovište na gospodarenje ne može to lovište ustupati drugim fizičkim ili pravnim licima.

- (4) Federalni ministar donosi pravilnik o načinu korištenja lovišta.

**Član 36.**  
**(Ugovor o dodjeli lovišta na korištenje)**

- (1) O dodjeli lovišta na korištenje, a na osnovu odluke nadležnog kantonalnog organa iz člana 33. stav 1. ovog zakona zaključuje se ugovor između kantonalnog ministarstva i korisnika lovišta.
- (2) O dodjeli posebnog lovišta na korištenje, a na osnovu odluke Vlade Federacije iz člana 25. stav 7. ovog zakona zaključuje se ugovor između Federalnog ministarstva i korisnika lovišta.
- (3) Ugovor iz st. 1. i 2. ovog člana mora sadržavati: naziv lovišta, podatke o registraciji korisnika lovišta, period na koje se daje lovište u zakup odnosno pod koncesiju, granice lovišta, procjenu brojnog stanja divljači, uslove kojih se korisnik lovišta mora pridržavati, mjere koje je korisnik lovišta dužan preduzeti u cilju unaprjeđivanja lovišta, mjere zaštite divljači, uslove organiziranja i finansiranja lovučvarske službe, odredbe o provođenju lovnoprivredne osnove, visinu i način plaćanja koncesione naknade odnosno zakupa, kao i uslove za raskidanja ugovora.
- (4) Ugovor o korištenju lovišta koje se daje pod koncesiju, osim navedenog u stavu 3. ovog člana mora sadržavati sve elemente iz člana 29. Zakona o koncesijama.
- (5) Pored elemenata iz st. 3. i 4. ovoga člana ugovorne strane mogu ugovoriti i druge obligaciono pravne elemente.

**Član 37.**  
**(Raskid ugovora sa korisnikom lovišta)**

- (1) Ugovor o dodjeli lovišta na korištenje sa korisnikom lovišta može se raskinuti:
- a. ako korisnik ne ispunjava uvjete, odnosno obaveze određene ovim zakonom, ugovorom, ili ne gospodari u skladu sa odredbama lovnoprivredne osnove;
  - b. ako je potrebno da se zemljište, šuma ili voda koristi za ciljeve koji isključuju mogućnost bavljenja lovstvom.
- (2) O raskidu ugovora iz stava 1. ovog člana odlučuje ministarstvo koje je zaključilo ugovor sa korisnikom lovišta.
- (3) Korisnik lovišta kojem je lovište oduzeto raskidom ugovora ima pravo na nadoknadu uložениh, a neiskorištenih sredstava.
- (4) Visina nadoknade iz stava 3. ovog člana utvrđuje se sporazumom između zainteresiranih ugovornih strana.
- (5) U slučaju kada se ne može postići sporazum o visini nadoknade odlučuje nadležni sud.
- (6) Nadoknada za izgrađene objekte i uništenu divljač utvrđuje se za objekte prema knjigovodstvenoj vrijednosti, a za divljač prema cjenovniku.
- (7) Nadoknadu plaća korisnik lovišta kojem je lovište, odnosno dio lovišta nakon raskida ugovora dato na gospodarenje.
- (8) Kantonalni, odnosno federalni inspektor za lovstvo pokreće postupak oduzimanja lovišta u slučaju iz stava 1. alineja 1. ovog člana.

**Član 38.**  
**(Obavljanje stručnih poslova lovstva)**

- (1) Korisnik lovišta mora osigurati da planiranje i realiziranje stručnih poslova lovstva obavlja lice koje ima visoku stručnu spremu sa VII stepenom VSS, odnosno master koji je stekao ovo zvanje po Bolonjskom procesu obrazovanja, a koje je u toku školovanja pohađalo i položilo predmet Lovstvo.
- (2) Pravilnik o stručnoj službi za provođenje lovnoprivredne osnove donosi federalni ministar.

**Član 39.**  
**(Gospodarenje lovištem koje nije dodjeljeno ili je oduzeto korisniku)**

- (1) Ako se na javni poziv za dodjelu lovišta koji raspisuje kantonalno ministarstvo niko ne javi, ili se ne javi dovoljan broj ponuđača na oglas, ili se od korisnika oduzme lovište na osnovu člana 37. ovog zakona, lovištem gospodari kantonalno ministarstvo.
- (2) Lovište koje putem oglasa nije moglo biti ustupljeno na korištenje u skladu sa stavom 1. ovog člana privremeno se daje na korištenje, bez konkursa, pravnom licu koje obavlja djelatnost lovstva ili udruženju, odnosno organizaciji lovaca do donošenja odluke o davanju lovišta na korištenje u skladu sa članom 36. ovog zakona.
- (3) Ustupanje u pogledu stava 2. ovog člana može trajati najduže jednu godinu.

**V – INFORMACIONI SISTEM, KATASTAR LOVIŠTA I EVIDENCIJA IZVRŠENIH RADOVA**

**Član 40.**  
**(Informacioni sistem)**

- (1) Federalno ministarstvo upravlja informacionim sistemom lovstva u Federaciji (u daljem tekstu: informacioni sistem), kojim se osiguravaju sve neophodne informacije o stanju lovišta i divljači, kao i realizaciji planova u lovstvu.
- (2) Korisnik lovišta dužan je dostavljati informacije iz stava (1) ovog člana.
- (3) Federalni ministar donosi pravilnik o obliku i sadržaju, načinu upravljanja, održavanja i korištenja informacionog sistema, kao i načinu unosa informacija i izvještaja.

**Član 41.**  
**(Katastar lovišta)**

- (1) Za svako lovište vodi se katastar lovišta.
- (2) Korisnik lovišta vodi katastar lovišta.
- (3) Korisnik lovišta je dužan po jedan primjerak izrađenog katastra lovišta dostaviti kantonalnom ministarstvu, a za posebna lovišta Federalnom ministarstvu.

- (4) Korisnik lovišta je dužan uz katastar lovišta dostaviti i izvod iz evidencije lovaca sa popisom lovaca i lovaca-pripravnika.
- (5) Korisnik iz stava 2. ovog člana dostavlja katastar lovišta sa svim evidentiranim promjenama najdalje do 30. aprila tekuće godine za proteklu lovnu godinu.
- (6) Kantonalno ministarstvo dostavlja Federalnom ministarstvu katastar lovišta za područje svog kantona i izvod iz evidencije lovaca sa popisom lovaca i lovaca-pripravnika najdalje do 15. maja tekuće godine za proteklu lovnu godinu.
- (7) Nakon uspostave informacionog sistema katastar lovišta vodit će se u elektronskoj formi.
- (8) Sadržaj i način vođenja katastra lovišta pravilnikom propisuje federalni ministar.

**Član 42.**  
**(Evidencija izvršenih radova i izvršenog lova)**

- (1) Korisnici lovišta dužni su voditi evidenciju izvršenih radova i provedenih mjera planiranih lovnoprivrednom osnovom i godišnjim planom, te istu dostaviti kantonalnom ministarstvu.
- (2) Korisnici posebnih lovišta dužni su voditi evidenciju izvršenih radova i provedenih mjera planiranih lovnoprivrednom osnovom i godišnjim planom, te istu dostaviti Federalnom ministarstvu.
- (3) Evidencije iz st. 1. i 2. ovog člana dostavljaju se do 15. aprila tekuće godine.
- (4) Nakon uspostave informacionog sistema evidencije iz st. 1. i 2. ovog člana vodit će se u elektronskoj formi.
- (5) Korisnik lovišta dužan je sačiniti evidenciju o svakom izvršenom lovu najkasnije 48 sati nakon završenog lova.
- (6) Evidencija izvršenih radova, izvršenog lova i provedenih mjera iz st. 1., 2. i 5. ovog člana upisuju se u obrasce koje pravilnikom propisuje federalni ministar.

**VI - PLANIRANJE U LOVSTVU**

**Član 43.**  
**(Strategija razvoja lovstva Federacije BiH)**

- (1) Strategija razvoja lovstva Federacije Bosne i Hercegovine (u daljem tekstu: strategija lovstva Federacije) poštujući međunarodnu i domaću legislativu definiše opću politiku lovstva i politiku privređivanja sa divljači na teritoriji Federacije, orijentisanu u pravcu očuvanja i trajnosti privređivanja sa divljači uključujući održavanje i unapređivanje biodiverziteta.
- (2) Strategija razvoja lovstva Federacije izrađuje se i donosi u okviru Šumarskog programa Federacije Bosne i Hercegovine.

**Član 44.**  
**(Lovnoprivredna osnova)**

- (1) Za svako lovište donosi se lovnoprivredna osnova.
- (2) Lovnoprivredna osnova je dugoročni planski dokument kojim se uređuje privređivanje lovištem i divljači na desetogodišnji period.
- (3) Lovnoprivrednu osnovu donosi korisnik lovišta na period od 10 godina.
- (4) Odredbe lovnoprivredne osnove su obavezne i bez nje lov nije dozvoljen.

#### **Član 45.**

##### **(Davanje saglasnosti na lovnoprivrednu osnovu i finansiranje izrade)**

- (1) Za lovišta koje je osnovala Vlada Federacije saglasnost na lovnoprivrednu osnovu daje Federalno ministarstvo, a za lovišta koja je osnovala skupština kantona saglasnost na lovnoprivrednu osnovu daje kantonalno ministarstvo.
- (2) Izrada nove lovnoprivredne osnove mora biti završena četiri mjeseca prije isteka važeće lovno-privredne osnove.
- (3) Greške i nedostaci lovnoprivredne osnove utvrđene od strane stručne komisije moraju se otkloniti u roku koji odredi komisija.
- (4) Izradu lovnoprivrednih osnova finansira korisnik lovišta, a izrada lovnoprivrednih osnova za posebna lovišta finansira se iz Budžeta Federacije.
- (5) Komisiju iz stava 3. ovog člana za posebna lovišta imenuje federalni ministar, a za lovišta koja je osnovala skupština kantona komisiju imenuje kantonalni ministar.

#### **Član 46.**

##### **(Sadržaj lovnoprivredne osnove i prebrojavanje divljači)**

- (1) Lovnoprivredna osnova naročito sadrži: prikaz stanja lovišta, osnovne biološke i fizičke karakteristike lovišta, sastav divljači (kvantitet i kvalitet), ciljeve privređivanja, vrste i obim radova, mjere i metode za postizanje ciljeva privređivanja, kao i ekonomsko-finansijsku osnovu privređivanja, program za unapređenje lovstva i lovočuvarsku službu.
- (2) Prikaz stanja lovišta naročito sadrži podatke o: površini lovišta, prirodnim i drugim uvjetima za život i razvoj divljači, stanju fonda divljači po pojedinim vrstama i prirastu divljači u lovištu.
- (3) Lovnoprivrednom osnovom mora se odrediti vrsta i broj divljači koja će se uzgajati u lovištu kao i obim zaštite i iskorištavanja divljači.
- (4) Lovnoprivredna osnova mora biti usklađena sa dugoročnim programom razvoja poljoprivredne proizvodnje i šumskoprivrednom osnovom za površine na kojima se lovište nalazi, kao i sa planovima upravljanja vodama, prostornim planom i ratifikovanim međunarodnim ugovorom iz oblasti lovstva, zaštite prirode i prirodnih staništa divljači.

#### **Član 47.**

##### **(Godišnji plan gazdovanja lovištem)**

- (1) Godišnji plan gazdovanja lovištem sastoji se od plana uređenja lovišta, plana uzgoja i zaštite divljači, plana korištenja divljači i finansijskog plana.

- (2) Godišnji plan gazdovanja lovištem izrađuje korisnik lovišta za period od 01. aprila tekuće do 31. marta naredne godine i dostavlja ga nadležnom ministarstvu do 31. marta tekuće godine radi dobijanja saglasnosti.
- (3) Saglasnost na godišnji plan gazdovanja lovištem daje kantonalno ministarstvo, a na godišnje planove gazdovanja za posebna lovišta daje Federalno ministarstvo.
- (4) Realizaciji godišnjeg plana gazdovanja lovištem može se pristupiti nakon dobijene saglasnosti od nadležnog organa.
- (5) Do donošenja lovnoprivredne osnove korisnici lovišta gazduju lovištem na osnovu privremenog godišnjeg plana gazdovanja lovištem, a najduže jednu godinu.
- (6) Postupak donošenja privremenog godišnjeg plana gazdovanja lovištem je isti kao i za redovni godišnji plan gazdovanja.

#### **Član 48.**

##### **(Uslovi za izradu i reviziju lovnoprivredne osnove)**

- (1) Izrada i revizija lovnoprivredne osnove može se povjeriti pravnom licu registrovanom za obavljanje djelatnosti iz oblasti lovstva, a koje u radnom odnosu ima najmanje jednog zaposlenika sa visokom stručnom spremom sa VII stepenom VSS, odnosno master koji je stekao ovo zvanje po Bolonjskom procesu obrazovanja, a koje je u toku školovanja pohađalo i položilo predmet Lovstvo i radnim iskustvom od najmanje tri godine na poslovima u oblasti lovstva ili fizičkom licu sa visokom stručnom spremom sa VII stepenom VSS, odnosno master koji je stekao ovo zvanje po Bolonjskom procesu obrazovanja, a koje je u toku školovanja pohađalo i položilo predmet Lovstvo i radnim iskustvom od najmanje tri godine na poslovima u oblasti lovstva, te da ima registrovan obrt za obavljanje djelatnosti iz oblasti lovstva.
- (2) Revizija lovnoprivredne osnove vrši se kada se trajno ili bitno izmijene uvjeti i okolnosti na kojima se zasniva lovnoprivredna osnova, a posebno uslijed uginuća više od 1/3 divljači, požara, elementarnih nepogoda, trovanja i slično.
- (3) Revizija lovnoprivredne osnove vrši se po istom postupku propisanom za njeno donošenje.
- (4) Federalni ministar donosi pravilnik o sadržaju, načinu i nosiocima izrade lovnoprivredne osnove, godišnjeg i privremenog godišnjeg plana gospodarenja lovištem.

#### **Član 49.**

##### **(Korištenje novca koji korisnik lovišta ostvari u gazdovanju lovištem)**

- (1) Sredstva koja korisnik lovišta ostvari u gazdovanju lovištem koriste se za realizaciju lovnoprivredne osnove (gazdovanje i unapređivanje lovstva).
- (2) Unapređivanjem lovstva smatra se:
  - a. zaštita, održavanje i poboljšanje životnih uvjeta za divljač u lovištu (poboljšavanje ispasišta, dodatno hranjenje, održavanje solila i pojilišta);
  - b. dostizanje i održavanje odgovarajuće spolne i starosne strukture pojedinih vrsta divljači u okviru utvrđenog kapaciteta lovišta;

- c. unošenje novih vrsta divljači u lovište;
- d. čuvanje i zaštita divljači i lovišta;
- e. izgradnja lovno-uzgojnih i lovno-tehničkih objekata;
- f. poduzimanje mjera za smanjenje šteta koje počini divljač;
- g. stručno osposobljavanje kadrova;
- h. izrada planskih dokumenata;
- i. naučno-istraživački rad u lovstvu;
- j. nabavka rasnih lovačkih pasa i
- k. izdavačka djelatnost.

## **VII - LOV I UPOTREBA DIVLJAČI**

### **Član 50.**

#### **(Zabrana neetičnog ponašanja u lovištu)**

Korisnici lovišta dužni su pri lovljenju i upotrebi divljači spriječiti neetična ponašanja u lovištu, uznemiravanje divljači u njenom staništu (naročito sa psima u vrijeme reprodukcije), otrovima, omamljujućim sredstvima i sl. čime se osigurava provođenje međunarodnih konvencija o zaštiti divljači i ptica.

### **Član 51.**

#### **(Pravo na lov divljači, mjesto i vrijeme lova)**

- (1) Divljač se može loviti samo u lovištu i pod uslovima utvrđenim ovim zakonom.
- (2) U lovu mogu učestvovati lovci pripravnici bez prava odstrela divljači i pod nadzorom instruktora.
- (3) Korisnik lovišta donosi kalendar lova kojim se određuju lovni dani, mjesto i vrijeme lova, uslovi za obavljanje lova divljači, kao i učešće lovaca u korištenju ulova.

### **Član 52.**

#### **(Način odstrjela i lova divljači)**

- (1) Odstrjel divljači dozvoljen je samo lovačkom puškom kuglaricom sa izolčenom cijevi i puškom sačmaricom.
- (2) Izuzetno od stava 1. ovog člana, odstrjel krupne divljači dozvoljen je samo lovačkom puškom kuglaricom sa izolčenom cijevi.
- (3) Zabranjen je lov i odstrjel divljači nabojima koji nisu lovački i poluautomatskim i automatskim oružjem sa spremnikom koji može sadržavati više od dva naboja municije.
- (4) Zabranjen je lov krupne divljači, osim divljih svinja, prigonom, progonom ili sa psima.
- (5) Način upotrebe lovačkog oružja i municije pravilnikom propisuje federalni ministar.

### **Član 53.**

#### **(Sticanje statusa lovca i lovački ispit)**

- (1) Divljač može loviti lice starije od osamnaest godina sa položenim lovačkim ispitom i da ispunjava opšte i posebne uslove za nabavljanje, držanje i nošenje oružja i municije.
- (2) Lice koje je tokom školovanja pohađalo i položilo predmet Lovstvo oslobođeno je polaganja lovačkog ispita.
- (3) Komisiju za polaganje lovačkog ispita formira federalni ministar.
- (4) Program, uvjate i način polaganja lovačkog ispita, kao i izdavanje potvrda, odnosno uvjerenja o položenom ispitu propisuje federalni ministar.

**Član 54.**  
**(Dozvola za lov divljači)**

- (1) Lov divljači vrši se na osnovu dozvole za lov.
- (2) Dozvolu za lov izdaje korisnik lovišta.
- (3) Federalni ministar propisat će pravilnikom oblik i sadržaj dozvole za lov.

**Član 55.**  
**(Zabrana uznemiravanja i lova divljači, sokolarski ispit)**

- (1) Divljač je zabranjeno uznemiravati i loviti:
  - a. u vrijeme kada je na prostoru na kojem je divljač ugrožena poplavom, snijegom, požarom, poledicom i prirodnim nesrećama;
  - b. slijepim ili osakaćenim životinjama koje se koriste kao živi mamci;
  - c. električnim i elektroničkim ubojitim ili omamljujućim napravama;
  - d. umjetnim izvorima svjetla, ogledalima i ostalim zasljepljujućim napravama, napravama za osvjetljavanje meta, optičkim nišanima za noćni lov s mogućnošću elektronskog povećavanja ili pretvaranja slike;
  - e. otrovom i otrovanim ili omamljujućim mamcima, zamkama, mrežama, gvoždama, klopkama, samostrijelom i eksplozivom, a ptice pomoću lijepaka, udicama, napravama za ubijanje ili omamljivanje strujom ili drugih sredstava za masovno uništavanje;
  - f. upotrebom gramofona, magnetofona, termovizijskih naprava, audioaparata i sličnim napravama, živih i umjetnih mamaca - vabila ili pomoću naprava koje djeluju na principu infra-crvenih zraka;
  - g. gađanjem iz motornih vozila, gaženjem motornim vozilima, presijecanjem pravca kretanja divljači motornim vozilima i gađanjem iz motornih čamaca koji se kreću brzinom preko pet kilometara na sat;
  - h. vojničkim oružjem, vojničkom municijom, sportskim malokalibarskim i poluautomatskim i automatskim oružjem sa spremnikom koji može sadržavati više od dva naboja municije;
  - i. hrtovima i nerasnim psima;
  - j. papkastu lovostajem zaštićenu divljač pomoću pasa;
  - k. medvjeda progonom i prigonom;
  - l. pticama grabljivicama i zvijerima;
  - m. upotrebom luka i strijele osim lova na visoku divljač u ograđenim lovištima do 1.000 ha;

- n. u noćima bez mjesečine (noćni lov) i bez izgrađenih objekata za lov;
  - o. sačmom na udaljenosti od 300 m od naselja i granice sa nacionalnim parkom, parkom prirode i drugim zaštićenim područjima i puškom kuglaricom na udaljenosti od 500 m od naselja i granice sa nacionalnim parkom, parkom prirode i drugim zaštićenim područjima.
- (2) Izuzetno od stava 1. ovog člana, korisnik lovišta može odobriti noćni lov i sa improviziranih objekata, ako je u pitanju sprečavanje šteta na poljoprivrednim imanjima, te može dopustiti hvatanje mladih divljih svinja u cilju suzbijanja svinjske kuge na način i pod uvjetima propisanim u članu 59. ovog zakona.
  - (3) Nerasnim psima iz alineje i. stava 1. ovog člana smatraju se psi koji nisu registrirani kod nadležne kinološke organizacije i koji nemaju odgovarajući rodovnik.
  - (4) Zabranjeno je sa psima proganjati divljač izvan terena ograđenog za trening u vremenu od 31. januara. do 31. jula.
  - (5) Zabranjen je lov divljači u plantažnim voćnjacima i vinogradima, rasadnicima i na drugim šumskim i poljoprivrednim površinama koje su ograđene ogradom kroz koju dlakava divljač ne može prolaziti, na površinama koje se koriste za vojne poligone i komunalne potrebe, kao i na drugim površinama i objektima na kojima je aktom o proglašenju njihove namjene zabranjen lov.
  - (6) Izuzetno od odredaba stava 1. ovog člana, licu koje ima položen sokolarski ispit dopušten je lov divljači pticama grabljivicama koje su za to posebno školovane.
  - (7) Sokolarski ispit polaže se pred Komisijom za polaganje lovačkog ispita koja se formira pri Federalnom ministarstvu.
  - (8) Program sokolarskog ispita i način lova divljači sa pticama grabljivicama (sokolarenje) propisuje federalni ministar.

#### **Član 56. (Lovački psi)**

- (1) U lovu se smiju isključivo koristiti čistokrvni lovački psi sa položenim ispitom urođenih osobina, potrebnim ispitom u radu propisanim za svaku pasminu pojedinačno koji posjeduje rodni list jedne od članica Međunarodne kinološke federacije (FCI) i koji imaju pozitivnu ocjenu u obliku (eksterijeru).
- (2) Vlasnici lovačkih pasa dužni su pse označiti, vakcinisati i upisati u registar pasa u skladu sa odredbama Zakona o veterinarstvu ("Službene novine Federacije BiH", broj 46/00) i prijaviti pse i nova legla jednoj od članica Međunarodne kinološke federacije u Bosni i Hercegovini.
- (3) Kinološki savez iz stava 2. ovog člana izdaje rodovnik kojim se dokazuje čistokrvnost i pasminska pripadnost, propisuju uvjete za ispit urođenih osobina i svaki pojedini radni ispit, te izdaju certifikat za položene radne ispite.
- (4) Vrstu i broj pasa za lov na pojedine vrste divljači u određenim područjima pravilnikom propisuje federalni ministar.

#### **Član 57. (Hvatanje divljači)**

Izuzetno od odredbe člana 55. stav 1. a. e. i f. federalni ministar može odobriti korisniku lovišta hvatanje divljači mrežama, klopkama i omamljujućim sredstvima, ali samo u naučne svrhe, za umjetni uzgoj, preseljenje u druga lovišta, kao i za potrebe zooloških vrtova i izvoz.

#### **Član 58.**

##### **(Zabrana lova u vrijeme kada bi to štetilo poljoprivrednim kulturama)**

Kantonalni ministar može propisati da se na zemljištima zasijanim ili zasađenim određenim poljoprivrednim kulturama može zabraniti lov divljači u vrijeme kada bi to štetilo tim kulturama.

#### **Član 59.**

##### **(Tereni za obuku i trening lovačkih pasa)**

Tereni za obuku i trening lovačkih pasa određuju se lovnoprivrednom osnovom. U tom cilju može se izdvojiti najviše do 5% od ukupne površine lovišta.

#### **Član 60.**

##### **(Ulovljena i uginula divljač, naknada za korišćenje divljači i usluge)**

- (1) Ulovljena ili uginula divljač i njeni dijelovi pripadaju korisniku lovišta.
- (2) Za korišćenje divljači i njenih dijelova, kao i za pružene usluge u lovištu korisniku lovišta plaća se nadoknada.
- (3) Ulovljena ili uginula divljač i njeni dijelovi na površinama izvan lovišta pripadaju kantonalnom ministarstvu ili licima kojim je povjerena zaštita divljači na tim površinama.
- (4) Lovac, član lovačkog udruženja koji je korisnik lovišta, plaća za upotrebu divljači i njenih dijelova:
  - a. za visoku divljač 40% od tržišne vrijednosti,
  - b. za nisku divljač 25% od tržišne vrijednosti.
- (5) Strani i domaći lovci turisti za upotrebu divljači i njenih dijelova i drugih usluga plaćaju punu tržišnu cijenu.
- (6) Cijenovnik odstrjela i upotrebe divljači te drugih usluga u lovištu na bazi tržišne vrijednosti donosi pravilnikom federalni ministar.

#### **Član 61.**

##### **(Potvrda o porijeklu divljači)**

- (1) Ulovljena ili uginula divljač i njeni dijelovi mogu se iznositi iz lovišta i stavljati u promet samo uz potvrdu o porijeklu divljači i njenih dijelova.
- (2) Potvrdu o porijeklu divljači i njenih dijelova na propisanom obrascu izdaje korisnik lovišta i sačinjava se u dva istovjetna primjerka, od kojih se jedan izdaje lovcu, a drugi ostaje u arhivi korisnika lovišta.
- (3) Obrazac potvrde o porijeklu divljači i njenih dijelova iz stava 2. ovog člana i uvjete pod kojima se može vršiti prepariranje divljači i držanje trofeja javno izloženih u

objektima, kao i upotreba mesa divljači u ugostiteljskim objektima, pravilnikom propisuje federalni ministar.

#### **Član 62. (Trofeji od divljači i trofejni list)**

- (1) Trofejima od divljači, u smislu ovog zakona, smatraju se rogovi srndaća, jelena, jelena lopatara, divojarca, divokoze i muflona, kljove divljeg vepra, lubanja i krzno medvjeda, vuka i divlje mačke, lubanja jazavca i lisice, kao i cijeli primjerak velikog tetrijeba.
- (2) Trofeji od divljači mogu se iznositi iz lovišta samo uz trofejni list.
- (3) Korisnik lovišta izdaje trofejni list i vodi evidenciju o izdatim trofejnim listovima.
- (4) Federalni ministar donosi pravilnik o obliku, sadržaju i postupku izdavanja trofejnog lista.

#### **Član 63. (Ocjena trofeja)**

- (1) Trofej ocjenjuje komisija sastavljena od tri člana koju formira korisnik lovišta.
- (2) Komisija iz stava 1. ovog člana vrši ocjenu trofeja na osnovu standarda Međunarodnog savjeta za lovstvo i zaštitu divljači (u daljnjem tekstu: CIC).
- (3) Članovi komisije iz stava 1. ovog člana moraju imati položen ispit za ocjenjivanje trofeja.
- (4) Program i način polaganja ispita iz stava 3. ovog člana donosi lovački savez.

#### **Član 64. (Vrhunski trofeji i banka podataka o vrijednim trofejima)**

- (1) Vrhunskim trofejima smatraju se tri trofeja ocijenjena sa najvećim brojem CIC poena određene vrste divljači u Federaciji na osnovu banke podataka o vrijednim trofejima.
- (2) Banku podataka o vrijednim trofejima vodi lovački savez.
- (3) Korisnici lovišta dužni su nadležnom lovačkom savezu dostaviti podatke iz trofejnog lista za trofeje vrijednosti bronzane medalje pa naviše.
- (4) Vrhunski trofej je vlasništvo onog ko je divljač odstrijelio, ali se ne može iznijeti izvan teritorije Federacije sve dok prema vrijednosti CIC poena ne dođe na 4. mjesto.
- (5) Korisnik lovišta dužan je upoznati stranog državljanina prije odlaska u lov sa propisima koji vrijede za vrhunske trofeje.
- (6) Obavijest o izlaženju određenog trofeja iz kategorije vrhunskih daje lovački savez i o tome obavještava Federalno ministarstvo.
- (7) Izuzetno od stava 4. ovog člana, federalni ministar, na prijedlog lovačkog saveza ili korisnika lovišta, može odobriti iznošenje vrhunskog trofeja izvan teritorije Federacije.
- (8) Federalni ministar donosi pravilnik o banci podataka vrijednih trofeja i kategoriji vrhunskih trofeja.

## VIII. SPREČAVANJE I NADOKNADA ŠTETE

### Član 65.

#### (Mjere za sprečavanje šteta od divljači i obaveza nadoknade štete)

- (1) Korisnik lovišta dužan je preduzimati mjere za sprečavanje šteta koju divljač može učiniti imovini ili ljudima na zemljištu i vodi na kojima se nalazi lovište (održavanje broja divljači prema kapacitetu lovišta, osiguranje prehrane u lovištu, postavljanje čuvara i dr.).
- (2) Vlasnici zemljišta i stoke, odnosno korisnici zemljišta na kojem je osnovano lovište dužni su na zemljištu, objektima gdje stoka boravi i opremi koja se koristi u obradi zemlje preduzimati uobičajene mjere za sprečavanje šteta od divljači i na divljači (učinkovitom ogradom, električnim pastirom, postavljanjem plašila, zaštitom mladih sadnica omotavanjem ili premazivanjem, ispašom stoke sa pastirom i pastirskim psom na površinama dozvoljenim za pašu, postavljanjem plašilica na kosačice i kombajne, sudjelovanjem u organiziranom progonu i sl.).
- (3) Korisnik lovišta i korisnici zemljišta i voda na čijem je području osnovano lovište, kao i korisnici okolnih zemljišta i voda mogu pitanje nadoknade štete koju divljač počinjuje regulirati i međusobnim sporazumom (ugovaranje paušalne nadoknade, osiguranje kod osiguravajućeg društva i sl.).
- (4) Federalni ministar će pravilnikom propisati mjere za sprečavanje šteta od divljači i na divljači.

### Član 66.

#### (Nadoknada štete počinjene mjerama korisnika lovišta)

Ako se radnjama, odnosno mjerama iz člana 68. stav 1. ovog zakona, počinjuje šteta, korisnik lovišta dužan je nadoknaditi štetu vlasniku, odnosno korisniku zemljišta na kojem se nalazi lovište.

### Član 67.

#### (Nadoknada štete koju počinjuje lovostajem zaštićena divljač)

- (1) Za štetu koju počinjuje lovostajem zaštićena divljač odgovoran je korisnik lovišta u čijem je lovištu šteta počinjena, ukoliko je oštećeni preduzeo propisane mjere zaštite.
- (2) Štetu koju počinjuje divljač za koju je propisana stalna ili privremena zabrana lova dužan je nadoknaditi onaj ko je propisao zabranu.
- (3) Izuzetno, za štetu koju počinjuje medvjed u lovištu nadoknadu plaća Federacija u visini od 45%, kantoni u visini od 25% i korisnik lovišta u visini od 30% od procjene štete.
- (4) Nema odgovornosti za štetu koju je počinila divljač:
  - a) na stoci bez pastira,
  - b) na područjima gdje je paša zabranjena,
  - c) ako nisu provedene mjere za sprečavanje šteta propisane članom 68. ovog zakona.
- (5) Obaveza oštećenog je da sačuva sve tragove koji ukazuju na pričinjenu štetu.

- (6) Za štetu nastalu naletom vozila na divljač odgovara se na sljedeći način:
- a) vozač ako se utvrdi da je upravljao vozilom protivno odredbama propisa kojima je uređeno područje o sigurnosti prometa na cestama i postojećim prometnim znakovima izričitih naredbi,
  - b) korisnik lovišta na čijem je lovištu nastala šteta ako se utvrdi da je šteta nastala zbog provođenja lova.

**Član 68.**  
**(Šteta koju prilikom lova učine lovci)**

Za štetu koju prilikom lova divljači učine lovci i njihovi pomoćnici odgovoran je korisnik lovišta, a korisnik lovišta ima pravo regresa od lovaca, odnosno njihovih pomoćnika.

**Član 69.**  
**(Nadoknada štete nanosene bespravnim lovom)**

- (1) Fizička ili pravna lica koja odstrijele, ili nanesu štetu divljači bespravnim lovom, ili na drugi nezakonit način, dužni su korisniku lovišta, u čijem lovištu ta divljač stalno boravi, nadoknaditi štetu prema odštetnom cjenovniku, a u slučaju spora određuje se nadležnost suda prema mjestu nastanka štete.
- (2) Korisnik lovišta je obavezan pokrenuti postupak nadoknade štete nanosene bespravnim lovom ili drugim nezakonitim postupkom iz stava 1. ovog člana.
- (3) Sporove o nadoknadi štete iz stava 1. ovog člana rješava nadležni sud.
- (4) Pravilnik o odštetnom cjenovniku iz stava 1. ovog člana donosi federalni ministar.

**Član 70.**  
**(Prijava o pričinjenoj šteti od divljači i uviđaj)**

- (1) Prijava o pričinjenoj šteti od divljači podnosi se kantonalnom ministarstvu odmah, a najkasnije u roku od tri dana od dana kada je šteta nastala.
- (2) Kantonalno ministarstvo dužno je odmah, a najkasnije tri dana po prijemu prijave štete odrediti komisiju za utvrđivanje uzroka štete i procjenu vrijednosti.
- (3) Komisiju sačinjavaju tri člana: predstavnik kantonalnog ministarstva (predsjednik komisije), stručno lice za procjenu vrijednosti štete (poljoprivredni ili veterinarski stručnjak) i stručno lice za utvrđivanje uzroka štete, šumarske, veterinarske, poljoprivredne ili biološke struke sa iskustvom na tim poslovima.
- (4) Komisija je dužna odmah izvršiti uviđaj i o svom radu sačiniti zapisnik. Na uviđaj se obavezno poziva oštećeni i korisnik lovišta.
- (5) Zapisnik komisije naročito sadrži: mjesto i način nastanka štete, znakove koji upućuju na određenu vrstu divljači, obim i visinu štete, kao i poduzete mjere oštećenog prije i poslije počinjene štete.

**Član 71.**  
**(Sporazum o naknadi štete)**

- (1) Po prijemu zapisnika iz člana 73. stav 4. ovog zakona, kantonalno ministarstvo pokušat će sporazumno utvrditi visinu štete između oštećenog i korisnika, odnosno organa odgovornog za nadoknadu štete.
- (2) Sporazum o nadoknadi štete naročito sadrži visinu nadoknade i rok njene isplate.
- (3) Sporazum o nadoknadi štete ima snagu izvršnog naslova.
- (4) Ako ne dođe do sporazuma, oštećeni će se pravno uputiti za podnošenje tužbe nadležnom sudu u pogledu utvrđivanja štete i njene visine.

## **IX. LOVOČUVARSKA SLUŽBA**

### **Član 72. (Lovočuvari)**

- (1) Korisnik lovišta dužan je osigurati lovočuvarsku službu.
- (2) Lovočuvarsku službu vrše lovočuvari kao službena (ovlaštena) lica zaposlena kod korisnika lovišta.
- (3) Lovočuvari vrše dužnost naoružani lovačkim oružjem u uniformi sa službenom oznakom - lovočuvar.
- (4) Lovočuvar može biti lice koja je završilo najmanje III. stepen srednje škole, koje je zdravstveno sposobno za vršenje određenih poslova utvrđenih za to radno mjesto, sa položenim lovačkim i lovočuvarskim ispitom, koje ispunjava uslove za nošenje oružja kao i druge uslove utvrđene zakonom i aktima korisnika lovišta.
- (5) Lovočuvar posjeduje legitimaciju lovočuvara koju izdaje korisnik lovišta.
- (6) Lovočuvar je dužan voditi službenu knjigu.
- (7) Federalni ministar propisat će pravilnikom oblik i sadržaj obrasca legitimacije lovočuvara, vođenje evidencije o izdatim legitimacijama, sadržaj službene knjige lovočuvara, oznake i izgledu uniforme lovočuvara i veličini lovočuvarskog rejona.

### **Član 73. (Ovlaštenja i dužnost lovočuvara, privremeno oduzeta sredstva, dužnosti lica koje se nalazi sa sredstvima za lov u lovištu)**

- (1) Lovočuvar je ovlašten:
  - a) od lica zatečenih sa sredstvima za lov u lovištu zahtijevati da pokažu dozvolu za lov, kao i druge isprave kojima se utvrđuje identitet tih lica;
  - b) zahtijevati ličnu ispravu od lica zatečenog u vršenju prekršaja, ili kaznenog djela koji se odnose na lovstvo i od lica za koje postoji osnovana sumnja da su izvršila takvo djelo ili prekršaj, ako ne može na drugi način da utvrdi identitet tog lica;
  - c) radi pronalazjenja predmeta kojima je izvršen prekršaj ili kazneno djelo koji se odnose na lovstvo, vršiti pregled vozila i drugih sredstava za prijevoz i prenošenje stvari za koja postoji osnovana sumnja da prevoze, odnosno prenose ulovljenu divljač, dijelove ulovljene divljači, ili trofeje od divljači;

- d) pregledati ulov i sredstva za lov, kao i utvrditi da li je lov obavljen u skladu sa propisima;
  - e) privremeno oduzimati i bez odlaganja predati nadležnom organu ulov, sredstva za lov, kao i druge predmete pronađene u lovištu, ako postoji osnovana sumnja da su upotrijebljeni ili bili namijenjeni za izvršenje kaznenog djela ili prekršaja koji se odnosi na lov, ili da su nastali ili pribavljeni izvršenjem takvog kaznenog djela ili prekršaja;
  - f) odstraniti ranjenu i bolesnu divljač;
  - g) obavještavati o pojavi bolesti ili uginuću divljači i opasnosti od elementarnih nepogoda.
- (2) Lovočuvar je dužan licu od kojeg su oduzeti ulov, psi i drugi predmeti za lov izdati potvrdu o oduzimanju spomenutih sredstava.
  - (3) Sa privremeno oduzetim sredstvima iz stava 2. ovog člana korisnik ne može raspolagati (uništiti, prodati, predati, zamijeniti i sl.) do okončanja prekršajnog postupka ili postupka pred drugim nadležnim organom.
  - (4) Zapisnik i potvrda o oduzimanju sredstava za lov koriste se u prekršajnom postupku kao dokaz uz prijavu za pokretanje prekršajnog postupka koji podnosi nadležni lovni inspektor ili oštećeni.
  - (5) U slučajevima iz stava 1. ovog člana lice koje je zatečeno sa sredstvima za lov u lovištu dužno je, na zahtjev lovočuvara, pokazati odobrenje za odstrjel i ispravu kojom se utvrđuje njegov identitet, kao i omogućiti pregled ulova, sredstava za lov, pregled vozila i drugih sredstava za prijevoz i prenošenje stvari.

#### **Član 74.**

##### **(Pokretanje postupka za bespravan lov)**

Zahtjev za pokretanje sudskog postupka za bespravan lov, pričinjenu štetu na divljači i lovištu podnosi korisnik lovišta na osnovu izvještaja - prijave lovočuvara i drugih službenih lica.

## **X. UPRAVNI NADZOR**

#### **Član 75.**

##### **(Upravni nadzor)**

- (1) Federalno ministarstvo vrši upravni nadzor nad primjenom ovog zakona i propisa donesenih na osnovu ovog zakona koji su ovim zakonom dati u nadležnost Federacije, kao i upravni nadzor nad radom ovlaštenih pravnih lica u prenijetim poslovima određenim ovim zakonom koji predstavljaju vršenje javnih ovlaštenja.
- (2) Federalno ministarstvo daje stručna uputstva i objašnjenja u primjeni ovog zakona nad radom pravnih lica kojima su povjerena javna ovlaštenja.
- (3) Federalno ministarstvo vrši i nadzor nad kantonalnim ministarstvima u dijelu izvršenja federalne politike u oblasti lovstva na teritoriji Federacije.
- (4) Kantonalna ministarstva vrše upravni nadzor nad provođenjem ovog zakona i propisa donesenih na osnovu ovog zakona koji su zakonom dati u nadležnost

kantona, kao i upravni nadzor nad obavljanjem poslova određenih ovim zakonom koji predstavljaju vršenje javnih ovlaštenja, a dati su u nadležnost kantona.

#### **Član 76. (Inspekcijski nadzor)**

- (1) Inspekcijski nadzor nad provođenjem ovoga Zakona vrše federalni lovni inspektori i kantonalni lovni inspektori u skladu sa odredbama ovoga Zakona, Zakona o inspekcijama Federacije Bosne i Hercegovine ("Službene novine Federacije BiH", broj 73/14) – (u daljnjem tekstu: Zakon o inspekcijama) i drugim propisima kojima se regulira rad federalnih i kantonalnih inspektora.
- (2) Federalna inspekcija može neposredno obaviti poslove iz nadležnosti kantonalne inspekcije, kada ocijeni da se na drugi način ne mogu provesti odredbe ovoga Zakona ili drugi propisi doneseni na osnovu njega, a kantonalna inspekcija nije obavila inspekcijski nadzor u za to naloženom roku ili nije završila postupak u roku.
- (3) Kantonalna inspekcija može po ovlaštenju i nalogu federalne inspekcije, izvršiti inspekcijski nadzor iz nadležnosti federalne inspekcije.

#### **Član 77. (Uslovi za imenovanje federalnog i kantonalnog inspektora)**

Za federalnog i kantonalnog inspektora koji vrše nadzor nad provođenjem ovoga Zakona može se imenovati lice koje ima visoku stručnu spremu sa VII stepenom VSS, odnosno master koji je stekao ovo zvanje po Bolonjskom procesu obrazovanja, a koje je u toku školovanja pohađalo i položilo predmet Lovstvo i ispunjava ostale uslove propisane posebnim zakonom.

#### **Član 78. (Ovlaštenja i dužnosti federalnog inspektora)**

- (1) Pored ovlaštenja i dužnosti određenih Zakonom o inspekcijama, federalni inspektor je ovlašten i dužan da:
  - a) kontroliše primjenu lovnoprivredne osnove;
  - b) kontroliše primjenu godišnjeg plana privređivanja lovištem, poslovne knjige i ostalu dokumentaciju kada je to potrebno radi kontrole primjene propisa i mjera koje se odnose na divljač i lovišta;
  - c) kontroliše rad Lovačkog saveza Federacije u poslovima koji su mu propisani ovim zakonom;
  - d) kontroliše provođenje odredbi ovog zakona o sanitarnom odstrjelu, odstrjelu za naučnoistraživačke svrhe kao i sokolarenje;
  - e) obavlja poslove i zadatke iz nadležnosti kantonalnog inspektora za šumarstvo ukoliko ovaj iz bilo kojeg razloga ne izvršava poslove i zadatke utvrđene ovim zakonom i propisima donesenim na osnovu njega.
- (2) Ukoliko utvrdi da je povrijeđen ovaj zakon ili drugi propis donesen na osnovu njega, federalni inspektor ima pravo i obavezu:

- a) rješenjem narediti otklanjanje utvrđenih nedostataka, odnosno nepravilnosti u određenom roku;
- b) podnijeti nadležnom organu zahtjev za pokretanje prekršajnog postupka, odnosno krivičnu prijavu i
- c) preduzeti i druge mjere, odnosno izvršiti druge radnje za koje je posebnim propisima ovlašten.

#### **Član 79. (Ovlaštenja i dužnosti kantonalnog inspektora)**

Pored ovlaštenja i dužnosti određenih posebnim zakonom, kantonalni inspektor je ovlašten i dužan da:

- a) kontroliše da li korisnik lovišta ispunjava propisane uslove za privređivanje;
- b) kontroliše da li je godišnji plan privređivanja lovištem u skladu sa lovnoprivrednom osnovom;
- c) kontroliše lovljenje divljači, odobrenje za odstrjel divljači i trofejne listove za ulovljenu divljač;
- d) kontroliše izvršavanje ugovornih obaveza korisnika lovišta;
- e) pregleda radove i objekte u lovištima;
- f) privremeno, do odluke nadležnog organa, oduzima bespravno ulovljenu ili bespravno prisvojenu divljač ili njene dijelove, kao i predmete kojima su izvršene ove bespravne radnje;
- g) naredi privremene mjere za sprječavanje štete u hitnim slučajevima u kojima bi mogla nastupiti šteta;
- h) prikuplja, kad je to potrebno, obavještenja od svjedoka, nalaz vještaka, odgovornih i drugih lica;
- i) vodi službene podatke za područje kantona o povredama odredaba ovog zakona i propisa donesenih na osnovu njega;
- j) izvještava nadležnu inspekciju i druge organe o nepravilnostima i predlaže sprovođenje određenih mjera, ako sam nije ovlašten za preduzimanje odgovarajućih mjera;
- k) kontrolira primjenu lovnoprivredne osnove;
- l) kontrolira primjenu godišnjeg plana privređivanja lovištem, poslovne knjige i ostalu dokumentaciju kada je to potrebno radi kontrole primjene propisa i mjera koje se odnose na divljač i lovišta;
- m) kontrolira provođenje ovog zakona o sanitarnom odstrjelu, odstrjelu za naučno istraživačke namjene kao i sokolarenje;
- n) podnosi zahtjev za pokretanje prekršajnog postupka radi povrede odredaba ovog zakona i propisa donesenih na osnovu njega;
- o) preduzima i druge mjere i radnje za koje je ovlašten posebnim propisima.

#### **Član 80. (Rješenja inspektora, rješenje ministarstva, pravo žalbe)**

- (1) Kada nadležni inspektor prilikom vršenja inspekcijuskog nadzora utvrdi da propis nije primijenjen ili je nepravilno primijenjen donijet će rješenje kojim će naložiti otklanjanje utvrđene nepravilnosti i odrediti rok u kome se one moraju otkloniti.

- (2) Protiv rješenja kantonalnog inspektora može se izjaviti žalba Federalnoj upravi za inspekcijske poslove u roku od osam dana od dana prijema rješenja.
- (3) Protiv rješenja kantonalnog ministarstva može se izjaviti žalba Federalnom ministarstvu u roku od 15 dana od dana prijema rješenja.
- (4) Protiv rješenja federalnog inspektora može se izjaviti žalba Federalnom ministarstvu u roku od osam dana od dana prijema rješenja.

## XI. KAZNE NE ODREDBE

### Član 81.

#### (Novčana kazna 10.000 KM do 15.000 KM za prekršaj pravnog lica)

- (1) Novčanom kaznom u iznosu od 10.000 KM do 15.000 KM kaznit će se za prekršaj pravno lice ako:
  1. lovi divljač na zemljištima i vodama izvan lovišta (član 7. st. 2.);
  2. ako dozvoli godišnji ulov divljači izvan granica predviđenih godišnjim planom gospodarenja (član 9. stav 2.);
  3. za vrijeme zabrane lova ili lovostaja lovi, proganja ili namjerno uznemirava divljač (član 14. st. 2. i 3.);
  4. dozvoli lov vrsta za koje je propisana stalna zabrana lova (član 15.) ili lovostajem zaštićenih vrsta za vrijeme trajanja lovostaja (član 16.) ili privremena zabrana lova (član 17.);
  5. vrši smanjenje broja zaštićene divljači bez dozvole Federalnog ministarstva (član 18. stav 2.);
  6. postupi protivno odredbama člana 19.;
  7. vrši trovanje divljači (član 23. stav 1. tačka b.);
  8. unosi u lovište oružje koje nije lovačko i postupa sa njim suprotno odredbama člana 24.;
  9. korisnik lovišta da u podzakup, ili ustupi drugom korisniku lovište (član 31. stav 10., član 33. stav 8. i član 34. stav 5.);
  10. korisnik lovišta ne osigura obavljanje stručnih poslova licima predviđenim u članu 38. stav 1.;
  11. korisnik lovišta ne vodi katastar lovišta na način kako je propisano članom 41.;
  12. na vrijeme ne donese lovnoprivrednu osnovu i lovi bez lovnoprivredne osnove (čl. 44. stav 3. i 4. i 45. stav 2.);
  13. ne donese i ne dostavi na odobrenje u propisanom roku privremeni plan gazdovanja ili godišnji plan gazdovanja lovištem (član 47.);
  14. ne donese opći akt iz člana 51. stav 3.;
  15. postupi protivno odredbama člana 54. st. 1. i člana 55. stav 1.a) od a. do o. i st. 4. i 5.;
  16. ne osigura i ne organizira lovočuvarsku službu na način kako je propisano članom 72.;
  17. lovnom inspektoru ne omogući pregled na osnovu ovlaštenja iz člana 78. i 79.

- (2) Za prekršaj iz stava 1. ovog člana kaznit će se novčanom kaznom u iznosu od 2.000 KM do 3.000 KM odgovorno lice u pravnom licu.

### **Član 82.**

#### **(Novčana kazna 5.000 KM do 10.000 KM za prekršaj pravnog lica)**

- (1) Novčanom kaznom u iznosu od 5.000 KM do 10.000 KM kaznit će se za prekršaj pravno lice ako:
1. ne izvrši inventuru životinjskih vrsta i stanja lovišta (član 10. stav 5. tačka a.);
  2. ako nema stručnu službu, odnosno stručno lice za sprovođenje lovnoprivredne osnove (član 10. stav 5. tačka c.);
  3. nema lovačkog psa osposobljenog za praćenje krvnog traga ili krvosljednika s položenim ispitom, ako u lovištu koje koristi ima predviđen odstrjel krupne divljači ili nema ugovor o korištenju psa sa pravnim ili fizičkim licem koje posjeduje takvog psa (član 10. stav 5. tačka f.);
  4. vlasnik pušta pse bez kontrole po lovištu, odnosno korisnik lovišta ne uklanja pse i mačke koji se kreću bez kontrole po lovištu (član 20. stav 2. i 3.);
  5. vrši naseljavanje novih vrsta divljači suprotno odredbama člana 21.;
  6. postupi protivno odredbama člana 22.;
  7. vrši ograđivanje lovišta protivno odredbama člana 28. stav 4.;
  8. korisnik lovišta ne obilježi granice lovišta (čl. 30.);
  9. ne ustanovi katastar lovišta, ne dostavi kantonalnom ministarstvu katastar lovišta ili ako izradi katastar lovišta bez inventure lovišta (član 41.);
  10. na propisanim obrascima i rokovima ne vodi i/ili ne dostavi evidenciju o izvršenom lovu i/ili izvršenim radovima i mjerama predviđenim lovnoprivrednom osnovom i godišnjim planom (član 42.);
  11. korisnik lovišta lov vrši prije dobivene suglasnosti (član 47. stav 6.);
  12. ne izvrši reviziju lovnoprivredne osnove (član 48. stav 2. i 3.);
  13. koristi ostvarena sredstva za druge svrhe, a ne za gazdovanje i unapređenje lovišta (član 49.);
  14. korisnik lovišta ne spriječi sva neetička ponašanja u lovištu (član 50.);
  15. dozvoli lov licima koja nemaju položen lovački ispit (član 53. stav 1.);
  16. ne pridržava se cjenovnika odstrjela i upotrebe divljači i drugih usluga u lovištu na bazi tržišne vrijednosti (član 60. stav.2. i 6.)
  17. ne osigura odobrenje za odstrjel (član 54.);
  18. ne izda potvrdu o porijeklu divljači i njenih dijelova (član 61. stav 2.)
  19. korisnik lovišta ne izda trofejni list i ne vodi evidenciju o izdatim trofejnim listovima (član 62. stav 3.);
  20. korisnik lovišta postupi suprotno odredbama člana 63;
  21. dozvoli iznošenje trofeja izvan teritorije Federacije (član 64. st. 4. i 7.);
  22. korisnik lovišta ne pokrene postupak nadoknade štete (člana 69. stav 2.);
  23. ne izda legitimaciju lovočuvaru i lovočuvar ne vodi službenu knjigu (član 72. st. 5. i 6.).
- (2) Za prekršaj iz stava 1. ovog člana kaznit će se novčanom kaznom u iznosu od 1.000 KM do 2.000 KM odgovorno lice u pravnom licu.

### **Član 83.**

### **(Novčana kazna 1.000 KM do 1.500 KM za prekršaj fizičkog lica)**

Novčanom kaznom u iznosu od 1.000 KM do 1.500 KM kaznit će se za prekršaj fizičko lice ako:

1. za vrijeme zabrane lova ili lovostaja proganja, lovi ili uznemirava divljač, ili na neki drugi način ugrožava opstanak divljači (član 14. stav 2. i 3.);
2. vrši lov ptica i sisara korisnih za poljoprivredu i šumarstvo (član 19. stav 1.);
3. vrši trovanje divljači (član 23. stav 1. tačka b.);
4. vrši odstrjel divljači nelovačkim oružjem (član 52. stav 1.);
5. lov vrši nabojima koji nisu lovački, ili poluautomatskom ili automatskom puškom (član 52. stav 3.);
6. vrši lov krupne divljači, osim svinja, prigonom i progonom ili sa psima (član 52. stav 4.);
7. vrši lov bez odobrenja za odstrjel (član 54.);
8. uznemirava i lovi divljač u slučajevima navedenim u članu 55. stav 1. tačka od a. do o., i st. 4. i 5.;
9. u lovu se koristi nečistokrvnim lovačkim psima, ne označi, ne vakciniše ili ne upiše u registar pasa i ne prijavi lovačkog psa ili novo leglo (član 56.);
10. vrši hvatanje divljači mrežama, klopama i omamljujućim sredstvima bez odobrenja federalnog ministra (član 57.);
11. uginulu divljač, ili ulovljenu divljač koristi suprotno članu 60. stav 1.;
12. iznosi iz lovišta i vrši promet divljači i njenih dijelova protivno odredbama člana 61. stav 1. i 2.;
13. iznosi iz lovišta trofej bez trofejnog lista (član 62. stav 2. i 3.);
14. na zahtjev lovočuvara ne pokaže lovačke i druge isprave, ili ne dozvoli pregled ulova, sredstava za lov ili sredstava za prijevoz, odnosno prijenos stvari (član 73. stav 5.);
15. lovnom inspektoru ne omogući pregled na osnovu ovlaštenja iz člana 78. i 79.

### **Član 84.**

### **(Novčana kazna 500 KM do 1.500 KM za prekršaj fizičkog lica)**

Novčanom kaznom u iznosu od 500 KM do 1.500 KM kaznit će se za prekršaj fizičko lice ako:

1. lovi divljač na zemljištima i vodama izvan lovišta (član 7. stav 2.);
2. lovi divljač nedozvoljenim sredstvima, na nepropisan način i izvan određenog vremena (član 9. stav 2.);
3. vrši lov ženki dok su bremenite, leže na jajima ili se hrane, uništava legla, gnijezda i jaja divljači (član 14. stav 5.);
4. vrši lov medvjeda i drugih zaštićenih divljači unutar zaštićenog uzgojnog područja (član 16.);
5. vrši lov određene vrste divljači za vrijeme privremene zabrane lova (član 17);
6. pušta pse ili mačke da se bez kontrole kreću po lovištu (član 20. stav 2.);
7. koristi hemijska sredstva štetna za divljač (član 23. stav 1. tačka f. I stav 2.);

8. postupi protivno odredbama člana 23. stav 1. tačke. a. do g.;
9. unosi u lovište oružje koje nije lovačko, ili se kreće izvan javnih puteva, ako vozi po tuđem lovištu sa oružjem koje nije u futroli ili prtljažniku vozila i ispražnjeno, ili se kreće lovištem sa lovačkom puškom i/ili lovačkim psima i/ili drugim sredstvima za lov bez odobrenja korisnika lovišta (član 24.);
10. vrši trening i obuku pasa protivno članu 59.;
11. bespravnim lovom nanese štetu divljači (član 69. stav 1.).

#### **Član 85.**

##### **(Zaštitne mjere oduzimanja: sredstava, imovinske koristi i dozvole za oružje)**

- (1) U postupku po prekršaju pored novčane kazne izreći će se i zaštitna mjera oduzimanja sredstava koja su upotrijebljena ili namijenjena za počinjenje prekršaja.
- (2) Licu koje počini prekršaj iz člana 84. stav 1. tač. od 1. do 8. i člana 85. stav 1. tač. 3. i 4. ovog zakona, uz izrečenu kaznu, izreći će se i zaštitna mjera oduzimanja sredstava koja su upotrijebljena za počinjenje prekršaja i oduzimanje imovinske koristi pribavljene počinjenim prekršajem.
- (3) Za slučaj iz stava 2. ovog člana izreći će se mjera oduzimanja dozvole za držanje i nošenje oružja u trajanju od dvije do pet godina.

## **XII. PRIJELAZNE I ZAVRŠNE ODREDBE**

#### **Član 86.**

##### **(Postupak nadoknade štete od divljači započet prije stupanja na snagu ovog zakona)**

Postupak za nadoknadu štete pričinjene od divljači započet prije stupanja na snagu ovog zakona nastaviti će se prema odredbama ovog zakona, ako do dana stupanja na snagu ovog zakona nije doneseno prvostepeno rješenje o nadoknadi štete.

#### **Član 87.**

##### **(Obaveza osnivanja i dodjele lovišta, obaveza korisnika lovišta, uzgoj i zaštita divljači do dodjele lovišta)**

- (1) U kantonima u kojima nisu osnovana i/ili dodijeljena lovišta nadležni organi dužni su u roku od dvanaest mjeseci od dana stupanja na snagu ovog zakona osnovati i/ili dodijeliti lovišta na korištenje u skladu sa ovim zakonom.
- (2) Korisnici lovišta dužni su u roku od šest mjeseci od dana dobijanja lovišta na korištenje uskladiti svoje poslovanje, opće i druge akte sa odredbama ovog zakona.
- (3) Do okončanja postupka ustanovljenja i dodjele lovišta na korištenje u skladu sa ovim zakonom, brigu o uzgoju i zaštiti divljači vodit će kantonalno ministarstvo.

- (4) Ukoliko nadležni kantonalni organi u roku od dvanaest mjeseci od dana stupanja na snagu ovog zakona ne osnuju i/ili ne dodijele lovišta na korištenje, osnivanje i/ili dodjelu lovišta će izvršiti Vlada Federacije na prijedlog federalnog ministarstva.
- (5) Federalni ministar će propisati postupak osnivanja i dodjele lovišta iz stava 4. ovog člana.

### **Član 88.** **(Donošenje podzakonskih akata)**

Federalni ministar će u roku od dvije godine od dana stupanja na snagu ovog zakona donijeti sljedeće podzakonske akte:

1. Pravilnik o vremenu lova lovostajem zaštićene divljači i popis vrsta ptica i sisara koji se smatraju korisnim za poljoprivredu i šumarstvo iz člana 16. stav (2) ovog zakona.
2. Pravilnik o načinu uspostave uzgajališta divljači iz člana 29. stav (5) ovog zakona.
3. Pravilnik o postupku osnivanja lovišta i obilježavanja granica lovišta iz člana 30. stav (2) ovog zakona.
4. Pravilnik o načinu korištenja lovištima iz člana 35. stav (4) ovog zakona.
5. Pravilnik o stručnoj službi za provođenje lovnoprivredne osnove iz člana 38. stav (2) ovog zakona.
6. Pravilnik o obliku i sadržaju, načinu upravljanja, održavanja i korištenja informacionog sistema u lovstvu, kao i načinu unosa informacija i izvještaja iz člana 40. stav (3) ovog zakona.
7. Pravilnik o sadržaju i načinu vođenja katastra lovišta iz člana 41. stav (8) ovog zakona.
8. Pravilnik o evidenciji izvršenih radova i provedenih mjera predviđenih lovnoprivrednom osnovom i godišnjim planom privređivanja lovištem iz člana 42. stav (5) ovog zakona.
9. Pravilnik o sadržaju, načinu i nosiocima izrade lovnoprivredne osnove, godišnjeg i privremenog godišnjeg plana gospodarenja lovištem iz člana 48. stav (4) ovog zakona.
10. Pravilnik o načinu upotrebe lovačkog oružja i municije iz člana 52. stav (5) ovog zakona.
11. Pravilnik o programu, uslovima i načinu polaganja lovačkog ispita, kao i izdavanje potvrda, odnosno uvjerenja o položenom ispitu iz člana 53. stav (4) ovog zakona.
12. Pravilnik o obliku i sadržaju dozvole za lov iz člana 54. stav (3) ovog zakona.
13. Pravilnik o programu sokolarskog ispita i načinu lova divljači pticama grabljivicama iz člana 55. stav (8) ovog zakona.
14. Pravilnik o vrsti i broju pasa za lov na pojedine vrste divljači u određenim područjima iz člana 56. stav (4) ovog zakona.
15. Pravilnik o cijenovniku odstrjela i upotrebe divljači te drugih usluga u lovištu na bazi tržišne vrijednosti iz člana 60. stav (6) ovog zakona.
16. Pravilnik o obrascu potvrde o porijeklu divljači i njenih dijelova i uslovima pod kojim se može vršiti prepariranje divljači i držanje trofeja javno

- izloženih u objektima kao i upotrebi mesa divljači u ugostiteljskim objektima iz člana 61. stav (3) ovog zakona.
17. Pravilnik o obliku, sadržaju i postupku izdavanja trofejnog lista iz člana 62. stav (4) ovog zakona.
  18. Pravilnik o banci podataka vrijednih trofeja i kategoriji vrhunskih trofeja iz člana 64. stav (8) ovog zakona.
  19. Pravilnik o mjerama za sprečavanje šteta od divljači i na divljači iz člana 65. stav (4) ovog zakona.
  20. Pravilnik o odštetnom cjenovniku za naknadu štete na divljači iz člana 69. stav (3) ovog zakona.
  21. Pravilnik o obliku i sadržaju obrasca legitimacije lovočuvara, vođenje evidencije o izdatim legitimacijama, sadržaj službene knjige lovočuvara, oznake i izgledu uniforme lovočuvara i veličini lovočuvarskog rejona iz člana 72. stav (7) ovog zakona.

**Član 89.**  
**(Primjena ranijih podzakonskih propisa)**

Do donošenja podzakonskih propisa predviđenih ovim zakonom, na teritoriji Federacije primjenjivat će se podzakonski propisi koji su se važili do dana stupanja na snagu ovog zakona, ako nisu u suprotnosti sa odredbama ovog zakona.

**Član 90**  
**(Prestanak važenja propisa)**

Danom stupanja na snagu ovog zakona prestaje da važi Zakona o lovstvu ("Službene novine Federacije BiH", br. 4/06, 8/10 i 81/14).

**Član 91**  
**(Stupanje na snagu)**

Ovaj zakon stupa na snagu osmog dana od dana objave u "Službenim novinama Federacije BiH".

Broj: 08-26/7-204-13/17 M.B.  
Sarajevo, 21.3.2019. godine

SKUPŠTINA KANTONA....1-10  
VLADA KANTONA....1-10  
KANTONALNO MINISTARSTVO NADLEŽNO ZA LOVSTVO....1-10 ✓

ZENIČKO-DOBOJSKI KANTON			
PRIMLJENO: 20-03-2019			
Org. jedinica	Šifra oznake	Redni broj	Broj priloga
05	02	5309	1

**Predmet: Mišljenje na Prednacrt Zakona o lovstvu, traži se -**

Poštovani,

Federalno ministarstva poljoprivrede, vodoprivrede i šumarstva izradilo je tekst Prednacrt Zakona o lovstvu. U izradi Prednacrt Zakona o lovstvu učestvovali su i predstavnici zainteresiranih strana: kantonalnih ministarstava nadležnih za oblast lovstva, lovačkih saveza, Šumarskog Fakulteta Univerziteta u Sarajevu i O.D. „Naše ptice“.

S obzirom da se radi o zajedničkoj nadležnosti federalne vlasti i kantona, neophodno nam je Vaše mišljenje na Prednacrt Zakona o lovstvu.

Tekst Prednacrt Zakona o lovstvu nalazi se na web stranici ovog Ministarstva [www.fmpvs.gov.ba](http://www.fmpvs.gov.ba), u izborniku: Šumarstvo (Aktuelnosti – Propisi u izradi).

Nakon što izvršite uvid u ponuđeni tekst predmetnog Zakona, potrebno je da Vaše mišljenje na isti dostavite ovom Ministarstvu poštom na adresu ul. Marka Marulića broj 2, Sarajevo, najkasnije do 20.4.2019. godine.

S poštovanjem,



DOSTAVLJENO:

1. Naslovu;
2. FMPVŠ, Sektor za šumarstvo i lovstvo;
3. Arhiva.

17-11-2017

04

17-11-2017			
05-26-			

Broj: 08-26/7-204-5/17 M.B.  
Sarajevo, 09.11.2017. godine

Na osnovu člana 70. Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05) i člana 48. Pravilnika o unutrašnjoj organizaciji Federalnog ministarstva poljoprivrede, vodoprivrede i šumarstva broj:01-02/1-1823/13 od 04.07.2013. godine, a u cilju realizacije plana rada za 2017. godinu, federalni ministar poljoprivrede, vodoprivrede i šumarstva, d o n o s i

## RJEŠENJE

### o imenovanju Radne grupe za izradu Prednacrtu Zakona o lovstvu

#### I

Za članove Radne grupe za izradu Radnog teksta Zakona o lovstvu, imenuju se:

1. mr.sc. Danica Cigelj, dipl.ing.šum., FMPVŠ, predsjednik;
2. Kemo Kadrić, dipl.ing.šum., FMPVŠ, član;
3. Muharem Bahor, dipl.ing.šum., FMPVŠ, član;
4. Elvir Gigić, dipl.prav., FMPVŠ, član;
5. mr.sc. Saša Kunovac, dipl.ing.šum., Šumarski fakultet, član;
6. Nešib Mutapčija, dipl.ing.šum., MPVŠ- HNK, član;
7. Ivan Raič, dipl.ing.šum., Ministarstvo gospodarstva- ZHK, član;
8. Jasmina Mezildžić, dipl.ing.šum., MPVŠ- SBK, član;
9. Pero Banjac, dipl.ing.šum., MPVŠ- USK, član;
10. Kemal Starogorčić, dipl.ing.šum., Ministarstvo privrede- KS, član;
11. Belma Mešić-Šeho, Ministarstvo za privredu- BPK, član;
12. Dr.sc. Mate Buntić, MPVŠ- K10, član;
13. Amira Jusufbašić, dipl.ing.šum., MPVŠ- ZDK, član;
14. Kasim Alić, dipl.ing.šum., MPVŠ- TK, član;
15. Hodžić Muhamed, dipl.ing.šum., SLOuBiH, član;
16. Ivica Lučić, mag.ing., LSHB, član;
17. Samed Mehmedović, dip.prav., SLDTK, član;
18. Dr.sc. Dražen Kotrošan, O.D. „Naše ptice“, član.

Administrativno-tehničke poslove za potrebe Komisije obavljat će Amra Dragoje, FMPVŠ.

#### II

Zadatak Radne grupe iz tačke I ovog rješenja je da izradi Prednacrt Zakona o lovstvu.

#### III

Radna grupa je obavezna nakon izvršenih poslova i zadataka iz tačke II ovog rješenja dostaviti izvještaj o radu federalnom ministru poljoprivrede, vodoprivrede i šumarstva najkasnije u roku od sedam dana od dana završetka poslova i zadataka.

awg... h... l... m... j...

#### IV

Rok za realizaciju zaduženja iz tačke II ovog rješenja je 90 dana, počev od dana stupanja na snagu ovog rješenja.

#### IV

Članovima Komisije nije predviđena naknada za rad u komisiji.

#### V

Ovo Rješenje stupa na snagu danom donošenja i objavit će se u „Službenim novinama Federacije BiH“.

### O b r a z l o ž e n j e

Članom 70. Zakona o organizaciji organa uprave u Federaciji Bosne i Hercegovine, propisano je da pojedinačne akte donosi rukovodilac organa uprave.


Federalno ministarstvo poljoprivrede, vodoprivrede i šumarstva imenuje Radnu grupu u svrhu izvršenja plana rada za 2017. godinu.

Članom 48. Pravilnika o unutrašnjoj organizaciji Federalnog ministarstva poljoprivrede, vodoprivrede i šumarstva utvrđeno je da se za izvršenje određenih poslova koji zahtijevaju kolektivni rad mogu formirati komisije (stalne ili privremene), radne grupe i druga radna tijela.

S tim u vezi, a postupajući u skladu sa označenim propisima, odlučeno je kao u dispozitivu ovog rješenja.

#### **POUKA O PRAVNOM LIJEKU**

Protiv ovog rješenja može se podnijeti prigovor federalnom ministru poljoprivrede, vodoprivrede i šumarstva u roku od 15 (petnaest) dana od dana prijema ovog rješenja.



#### **DOSTAVITI:**

1. Imenovanim (18x);
2. Sektor za šumarstvo i lovstvo;
3. Sekretar FMPVŠ;
4. Sektor za pravne, kadrovske i opće poslove;
5. Arhiva.